

小

爾

雅

疏

證

直齋書錄解題小爾雅三卷漢志有此書亦不著  
志有李軌解一卷今館閣書目云孔鮒撰蓋卽孔鮒子第  
十一篇也曰廣詁廣言廣訓廣義廣名廣服廣器廣物廣  
鳥廣獸凡十章又廣度量衡爲十三章當時好事者鈔出  
別行又李濂孔叢敘嘉祐中宋咸嘗爲之注矣李軌之書  
自宋南渡後卽不傳宋咸所注甚簡略吳師道國策補注  
所引有出今本外者則其爲後人刪節久矣攷漢志其書  
入於孝經家而不從小學之列可知其來已古曩元編輯  
經籍纂詁亦曾采及其書頗以無箋疑本爲歎今致仕歸  
竊見葛君錢生所著疑證四卷并其友瑁王君研雲所掇  
叔之佚文一卷埒疑篇末共五卷廣徵博引粲然畢具近  
年吳門宋氏有訓纂五卷離析廣服廣器爲卷四廣物已  
下爲卷五與此小異後埒佚文塵數條未經箋釋且間與

正文重出不逮此書之詳備精審甚君爲吾郡邵子顯學  
師受業姊聳學師以是書索敘因書此以應

道光二十年春揚州節性齋老人阮元序時年七十有七  
自倉頡制造文字黃帝因之以成命百物聲音訓詁之原  
肇始萌芽厥後爾雅作於姬公九流津涉六藝鈴鍵依類  
敷言雜而不越械械乎文章爲大備已亞斯之代揚雄著  
方言劉熙纂釋名張揖成廣雅皆以羽翼雅訓補所未及  
若小爾雅亦其一也小爾雅者今孔叢子弟十一篇孔叢  
之書不見于漢唐藝文志意其爲後人僞托而小爾雅一  
篇漢志列孝經家則其書本出先秦固非鄉壁虛造者比  
循習既久真僞易淆缶二謂鍾則齊量之新舊不分四尺  
謂仞則攷工之澮洫同制其他援引或滋傳訛疑皆魏晉  
以後俗師埒益以自申其說如爾雅瑟兮僂兮之美衛武

猗嗟名兮之刺魯莊非定出元聖之手要未可以小疵而議其全體也

聖朝崇尚儒風經術振起闕達俊哲之彥靡不參稽古訓綜究雅言是編篇次雖約而義據宏深傳授近古而名物條貫則亦小學不可少之書而通經之士必于焉取證者不揆櫛昧爲之博采傳注劄及羣籍審其義趣明其指歸或有未寤姑從闕如懼穿鑿也今世所傳之本雜臚歧出擇善而從不拘一例更有訛舛特甚而見于他書所引据者急爲訂正按義類以舉隅資聞見之一得庶幾其有合與友婿王君寶仁孥覃雅故相與商析疑誼反覆鉤稽良多啟悟王君又復薈萃各本攷異同拾墜遺因并爲之證埒于篇尾至舊志所載李軌解今不傳宋注漏略已甚亦不復存云時甲戌長至後二日嘉定葛其仁元朧甫記

是書成二十餘年舟車南北恆用自隨偶有所得應時  
改定然終未敢自信頃因檢理篋衍出示同學咸從與  
付梓勉出所業就正有道享帚之誚知不免矣道光己  
亥九月朔其仁并記

小爾雅疏證卷一

嘉定葛其

廣詁一

許慎說文解字曰詁訓故言也詁故通漢書藝文志書有大小夏侯解故詩有魯故齊后氏故齊孫氏故韓故毛詩故訓傳亦與古通詩丞民古訓是式鄭箋云古訓先王之遺典也案爾雅有釋詁篇此云廣者廣爾雅所未備凡爾雅所載此篇不復見其有重出者疑爲後人所竄入矣

淵懿邃蹟深也

淵者詩燕燕其心塞淵毛傳淵深也爾雅釋天太歲在亥曰大淵獻孫炎曰淵深也大獻萬物於深懿者詩七月女執懿筐毛傳懿筐深筐也楚辭逢尤懿風后兮受瑞圖王逸注懿深也邃者說文邃深遠也禮記玉藻前後邃延陸氏釋文邃深也通作隧攷工記輿人參分車廣去一以爲隧鄭司農云隧謂車輿深也康成謂讀如邃字之邃蹟者後漢書順帝紀能探蹟索隱者注蹟幽

深也案字當作嘖說文無隨字易繫辭傳言天下之至  
隨京房許慎本皆作嘖荀子正名篇嘖然而不亂楊倞  
注嘖與隨同隨深也

封巨莫莽艾祁大也

封者詩烈文無封靡于爾邦毛傳封大也左昭二十八  
年傳謂之封豕杜注封大也巨者史記楚元王世家過  
巨嫂食索隱巨大也謂長嫂也淮南說山訓巨雖可而  
長不足高誘注巨大也通作鉅禮記三年問創鉅者其  
日久釋文鉅大也莫者史記廉頗藺相如傳布租皆輸  
入莫府集解引如淳曰將軍征行無常處所在爲治故  
言莫府莫大也案据此莫當爲幕史記屈原賈生傳莫  
邪爲頓集解引許慎曰莫邪大戟也則莫自有大義莽  
者呂覽知接篇何以爲之莽莽也高誘注莽莽長大貌

文選吳都賦相與騰踔乎莽叢之野注莽叢廣大貌案一切經音義引通俗文水廣大謂之潏沆爾雅釋魚釋文引字林蟒大蛇也皆取莽爲義是莽爲大山艾者爾雅釋詁艾長也禮記曲禮五十曰艾注艾老也俱有大義故宋咸舊注艾亦爲久祁者詩吉日其祁孔有傳祁大也箋云祁當作麇案麇是獸之大者周禮大司馬注引鄭司農云五歲爲慎康成謂慎讀爲麇

頒賦鋪敷布也

頒者文選東京賦布教頒常薛注頒布也通作班周禮大宰匪頒之式鄭司農云頒讀爲班布之班案說文頒大頭也从頁分聲一曰贊也段借字賦者詩烝民明命使賦傳賦布也呂覽慎大篇賦鹿臺之錢淮南時則訓賦之犧牲注並訓布鋪者左宣十二年傳鋪時繹思注



鋪布也敷者詩小旻敷于下土毛傳敷布也史記夏本紀引禹貢篠簜既敷作竹箭既布又晉世家引文侯之命敷聞在下作布聞在下

蓋戴燾蒙冒覆也

蓋者左莊三十二年傳能投蓋於稷門注蓋覆也孟子萬章篇謨蓋都君成我績趙岐注蓋覆也戴者釋名戴載也載之於頭也故義爲覆也燾經典通作幬禮記中庸無不覆幬注幬或作燾左襄二十九年傳如天之無不幬也史記吳世家作燾賈逵曰燾覆也又通敦周禮司几筵每敦一几注讀爲燾覆也蒙者詩君子偕老蒙彼縗絺傳蒙覆也左傳十年傳蒙之甲以爲櫓杜注同一通幬逸周書太子晉解若能幬予孔晁注幬覆也冒者易繫辭傳冒天下之道注冒覆也攷工記玉人天子

執言四寸注名玉曰言者言德能覆言天下也荀子注引尙書大傳逸語古之人衣上有言而句領者注云言覆項也

鐘崇府最積灌聚樸叢也

鐘通作鍾左昭二十一年傳器以鍾之注鍾聚也淮南天文訓音比黃鍾注鍾者聚也崇者左隱六年傳芟夷蘊崇之注崇聚也府者左昭十二年傳吾不爲怨府注言不能爲季氏逐小生怨禍之聚國策秦策此謂天府高誘注府聚也最者鄭氏樂記濫以立會會以聚衆注濫之意猶擘聚也會猶聚也聚或爲最史記殷本紀大最樂戲于沙邱徐廣曰最一作聚管子禁藏篇冬收五藏最萬物注最聚也蓋古最聚通積者禮記儒行不斂多積注積聚財物也漢書刑法志完者使守積注積

積聚之物也案鍾崇府最傳注皆訓爲聚此釋爲叢者  
義得通轉也周南葛覃釋文叢俗作藂一本作最顏氏  
家訓書證篇江南詩古本皆爲藂聚之藂而古叢字似  
宜字案此則聚藂二字本易譌混灌者爾雅釋木灌木  
叢木詩葛覃傳義同又木族生爲灌孫炎云族叢也夏  
小正啓灌藍蓼傳灌也者藂生者也聚者呂覽達鬱篇  
而萬災叢聚矣注叢聚也轉相訓樸者爾雅釋木樸枹  
者注樸屬叢生者爲枹

閱搜履庀具也

閱者說文云具數於門中也徐鍇曰春秋大閱簡車馬  
也具數一一數之也搜通蒐左成十六年傳蒐乘補卒  
注蒐閱也閱訓具故搜亦訓具履義未詳疑當作展周  
禮充人展牲先鄭云展具也庀者周禮遂師庀其委積

注庀具也左襄五年傳宰庀家器又二十五年傳子木使庀賦注皆訓具通作比周禮世婦比其具鄭司農比讀爲庀庀具也

攻爲話相甸宰營匠治也

攻者周禮瘍醫以五毒攻之注攻治也左襄十五年傳使玉人爲之攻之注攻治也爲者左昭元年傳弗可爲也已又十八年大爲社注皆訓治話義未詳疑當作詰周禮大司馬詰禁注詰猶窮治也相者左昭九年傳火水妃也而楚所相也注相治也甸者廣雅釋詁甸治也穀梁桓十四年傳必有兼甸之事釋文甸一本作甸詩信南山維禹甸之傳甸治也甸一作甸故甸亦訓治宰者周禮太宰注治官之長公羊僖九年傳公會宰周公注宰猶治也營者詩黍苗召伯營之箋云營治也匠者

說文云木工也从匕从斤斤所以作器也是有治義

蠲祓禴肩潔也

蠲者詩天保吉蠲爲饎傳蠲絜也古通圭韓詩吉圭惟  
傳周禮蜡人注引之訓圭爲潔孟子滕文公篇必有圭  
田趙注亦訓潔祓者周禮女巫掌四時祓除釁浴通作  
弗詩生民以弗無子箋云弗之言祓也禴者說文云潔  
祀也書疏引孫炎爾雅說絜敬之祭也左隱十一年傳  
况能禴祀許乎注絜齊以享謂之禴通作湮尚書大傳  
湮于六宗又通煙周禮大宗伯注禴之言煙義得相叶  
也肩者詩谷風不我肩以又君子偕老不肩髡也傳皆  
訓潔孟子盡心篇欲得不屑不潔之士注肩潔也  
勿蔑微曼末沒無也

勿者詩東山勿士行枚箋勿無也儀禮少牢饋食禮勿

替引之鄭注勿猶無也茂者說文云勞目無精也易剝  
茂貞凶釋文引馬注茂無也微者詩式微傳微無也禮  
記檀弓曾子曰微與注猶無也曼者揚子法言五百篇  
病曼之也注曼無也又重黎篇聖人曼云注同又寡見  
篇曼是爲也皆無之義末者禮記檀弓不忍一日末有  
所歸也鄭注末無也公羊隱六年傳吾與鄭人末有成  
也成十有六年末言爾注並訓無沒者史記酷吏傳張  
湯始爲小吏乾沒如淳曰得利爲乾失利爲沒

隆巢岸峻高也

隆者爾雅釋山宛中隆注隆中央高國策齊策雖隆薛  
之城注崇高也史記高祖紀隆準應劭曰隆高也巢者  
說文云鳥在木上曰巢左成十六年傳楚子登巢車說  
文作輶云兵車高如巢以望敵也爾雅釋樂大笙謂之

巢舍人云音聲衆所高也岸者爾雅釋邱望厓洒而高岸詩皇矣誕先登于岸傳岸高位也峻者左昭二年傳垂不峻注峻高也

逼尼附切局鄰傳戚近也

逼與偏同左隱十一年傳實偏處此又莊二十二年傳晉桓莊之族偏皆謂逼近尼者說文云從後近之爾雅卽尼也郭璞訓尼爲近引尸子悅尼而來遠通作昵釋名昵近也考工記注引杜子春曰昵或爲勑勑黏也附者淮南說林訓附耳之言注附近也呂覽貴直篇趙簡子攻衛附郭注附郭近郭也切者後漢書襄楷傳還切執法注切謂迫近也揚雄長楊賦請畧舉其凡而客自覽其切焉注引張晏云切近也局者說文云促也案魏文帝與吳質書塗路雖局守官有限鄰者詩正月洽比

其鄰傳鄰近也傳者考工記廬人重欲傳人鄭注傳近也戚者書金縢未可以戚我先王傳戚近也逸周書文酌解取戚免桎孔注戚近也通作倣廣雅倣近也

邵媚旨伐美也

邵者法言重黎篇賢者不足邵也注邵美也媚者說文說也从女眉聲案女之嫵媚在眉詩有美一人清揚婉兮傳謂眉目之間婉然美也旨者詩谷風我有旨蓄傳旨美也伐者左莊二十八年傳且旌君伐注伐功也案此謂自美其功也

賢哀繁優饒夥多也

賢者說文多才也呂覽順民篇則賢於千里之地注賢猶多也哀者詩般哀時之對毛訓聚鄭訓衆皆有多義繁者詩正月繁霜傳繁多也優者詩信南山旣優旣渥



釋文云說文作漫云澤多也淮南俶眞訓小大優游注  
言饒多也饒者禮記曲禮不饒富注勿多於禮也夥說  
文作𣪠云齊謂多爲𣪠方言凡物盛而多齊宋之郊謂  
之夥吳音謂多爲夥問幾何曰幾夥史記陳涉世家夥  
頤涉之爲王沈沈者楚人謂多爲夥故天下傳之

幾蔡模臬法也

幾與譏通禮記執禁以譏注譏察也又玉藻御瞽幾聲  
之上下注幾猶察也故訓爲法蔡者書禹貢二百里蔡  
馬融曰蔡法也法王者刑法而已案字當作𣪠左昭元  
年傳周公般管叔而蔡蔡叔注上蔡字音素葛反從般  
下米模者說文云法也一切經音義引聲類模法之也  
臬者廣雅釋詁臬灋也考工記匠人注𣪠古文臬賈疏  
今之𣪠從木𣪠聲之省者也古之𣪠爲臬法字

爰換變貿交更易也

爰者左僖十五年傳作爰田服虔曰爰易也史記酷吏傳爰書蘇林曰爰易也以此書易其辭處本作起又通轅說文爰籀文以爲車轅字又起田易居也案漢書地理志制轅田注引孟康曰轅爰同三年爰土易居古制也換者漢書敘傳項氏畔換孟康曰換易也變者周禮司燿四時變國火注變猶易也詩猗嗟四矢反兮釋文反韓詩作變變易貿者說文云易財也一切經音義引二蒼貿易也交者公羊宣十一年傳臣交易爲言交易連文更者禮記月令更皮幣注更猶易也

生造奏詣進也

生者說文云進也象艸木生出土也造者書盤庚其有衆咸造周禮大司寇以兩造禁民訟注造至也故爲進

義奏者漢書司馬相如傳臨邛令前奏琴師古曰奏進也詣者古以所至爲詣文選洞簫賦注引蒼頡篇詣至也

索寒採哀鉤掠採畧也

案方言畧強取也左宣十五年傳以畧狄土是獲取之總名索者周禮方相氏以索室驅疫鄭注索度也離騷索薺茅以筵簞兮注索取也寒當爲摻說文摻拔取也引楚辭朝攘批之木蘭案今本摻作牽牽又作撻方言撻取也採者漢書楊雄傳音義引字林採強取也哀者漢書食貨志贊易稱哀多益寡師古曰哀取也本作攄說文攄引取也引易攄多之攄鉤者荀子彊國篇勁魏鉤吾右注鉤謂鉤取物也掠者左昭二十年傳輸掠其聚注掠奪取也採本當作采說文云埒取也

開徹接通達也

開者禮記樂記開而弗達注開謂發頭角正義曰但爲學者開發大義頭角而已亦不事事使之通達案開達義有淺深而意相承也徹者左成十六年傳徹七札焉注一發達七札言其能陷堅昭二年傳徹命於執事注徹達也接之爲達經傳無正文案儀禮鄉射禮兼挾四矢注云古文挾作接詩大明使不挾四方傳挾達也通者蔡邕石經尙書用克通殷今本通作達禮記儒行上通而不因注仕道達於君也

固厯彌宿舊尙久也

固者禮記月令國多固疾注生不充杜有久疾也國語晉語臣固聞之注固久也案固與故通論衡引論語故天縱之將聖史記魯世家引周語咨于固實故固本一

字厯者爾雅釋詁艾厯也注長者多更厯詩庭燎夜未  
艾傳艾久也轉相訓彌說文作𦵏久長也周書謚法解  
彌久也楚辭招魂願彌代些注彌久也宿者漢書徐樂  
傳天下無宿憂師古曰宿久也舊者詩抑告爾舊止箋  
云舊久也書無逸舊勞于外舊爲小人史記皆作久尙  
者呂覽古樂篇樂之所由來者尙矣注尙久也

彌愈滋彊益也

彌者儀禮士冠禮三加彌尊注彌猶益也愈者詩小明  
政事愈盛箋云愈猶益也說文無愈字當作逾呂覽務  
大篇此所以欲榮而逾辱也淮南原道篇火逾然而消  
逾亟注皆訓益通作愈廣雅釋詁愈益也滋者左襄八  
年傳事滋無成注滋益也通作茲漢書匈奴傳前世重  
之茲甚師古曰茲益也彊者算法以有餘爲彊

赫敦爽曉昕著讚曙明也

赫者孝經三才章引詩云赫赫師尹注赫赫明盛貌也  
敦係傳寫之譌一切經音義二十四引小爾雅赫煒明  
也案方言曙明也廣雅曙明也書洪範曰驛鄭本作圉  
訓爲色澤光明皆可證爽者左昭元年傳茲心不爽注  
爽明也曉者淮南俶眞訓獨見曉焉注曉明也昕者說  
文云旦明日將出也孔穎達詩正義昕者明也日未出  
已名爲昕至日出益明著者禮記大傳名著而男女有  
別注著明也又樂記著不息者天也注著猶明白也讚  
者易說卦傳幽贊於神明釋文本或作讚韓康伯注贊  
明也書皋陶謨思日贊贊襄哉正義引鄭注贊明也言  
能贊明帝德曙者淮南天文訓曙於蒙谷之浦注曙明  
也

皆附襲就因也

皆係傳寫之譌文選南都賦高祖階其塗注引小正階因也曹植應詔詩黃坂是階王融策秀才文斯路何階注引並同附者孟子萬章篇附於諸侯曰附庸注因大國以名通襲者禮記中庸下襲水土注襲因也通作習書大禹謨卜不習吉疏引鄭表記注襲因也就者諸侯遷廟禮君就東廂西面祝就西廂東面廬辯曰因其便封畛際限疆略界也

封者周禮大司徒制其畿疆而溝封之注封起土界也畛者文選張衡東京賦施已回乎郊畛李善注引太元宋注畛界也際者左定十年傳屬與倣邑際漢書翼奉傳詩有五際應劭釋爲陰陽終始交會之歲則際是交界也限者國策秦策南有巫山黔中之限廣雅亦云限

界也疆者詩信南山我疆我理傳疆畫經界也周禮掌  
疆注疆界也通作畺周禮載師以大都之田任畺地注  
畺五百里王畿界也略者左莊二十一年傳王與之武  
公之略注略界也

承第班列次也

承者左昭十三年傳子產爭承注承貢賦之次國語晉  
語虢射爲右以承公注承次也第者左哀十六年楚國  
第注用士之次第呂覽原亂篇亂必有弟高誘訓爲次  
案第本當作弟說文弟韋束之次弟也班者儀禮既夕  
禮以其班補注班次也禮記曲禮班朝治軍注同列者  
禮記禮運故事可列也注列興作有次第文選張衡東  
京賦清道案列薛綜注列猶次也

戶校格扈止也



戶者左宣十二年傳屈蕩戶之注戶止

今本左傳戶作尸

漢書

王嘉傳坐戶殿門失關免師古曰戶止也引左氏傳爲證悛者左隱六年傳長惡不悛注悛止也格者漢書梁孝王傳太后議格集注引張晏曰格止也扈者左昭十七年傳扈民無淫者也注扈止也止民使不淫放

幽暄闇昧冥也

幽者春秋元命包幽之言窈也言風出入窈冥揚子太元經而幽其所以然者何也集解幽冥也暄者釋名暄翳也言掩翳日光使不明也詩終風且暄不日又暄傳引爾雅陰而風曰暄闇者禮記曲禮孝子不服闇注闇冥也公羊莊二十五年傳或曰爲闇注爲天闇冥案一切經音義卷一卷十七並引小爾雅幽暄暗昧冥也則寧當作暗昧者易屯卦彖傳天造草昧注造物之始始

於冥昧故曰草昧也

最凡口質要也

最者漢書宣帝紀課殿最以聞注最凡要之首也又嚴  
助傳順奉三年計最注引晉灼曰最凡要也凡者一切  
經音義二十二引三蒼凡數之總名也公羊傳云一事  
而再見者先目而後凡也目者周禮箬人四曰巫目注  
目謂事衆筮其要所當也質者左文六年傳由質要注  
質要契券也

彊窮充竟也

彊者詩七月萬壽無彊傳彊竟也儀禮士冠禮黃耆無  
彊鄭注同窮者漢書律厯志易窮則變孟康曰窮終也  
後漢書酷吏傳爲窮怒之所遷及者注窮極也是皆有  
竟義充者陸機漢高祖功臣頌文武四充

而乃爾若汝也

而者禮記月令以固而閉注而猶女也儀禮而不善乎  
注同乃者周禮小宰各修乃職攷乃瀆注乃猶女也案  
洪範謀及乃心史記作謀及女心爾者詩雄雉百爾君  
子箋爾女也若者考工記惟若甯侯儀禮士昏禮若則  
有常注皆訓爲女

控轡挽引也

控者詩載馳控于大邦傳控引左襄八年傳無所控告  
注控引也轡者淮南原道訓轡基衛之箭注轡引也通  
作關左昭二十一年傳豹則關矣注關弓引弓挽依字  
當作輓說文輓引車也左襄十四年傳或輓之注前牽  
曰輓漢書韓安國傳轉粟輓輸師古曰輓引舉也  
承贊涼助佐也

承者左哀十八年傳請承注承佐也案承丞古通呂覽  
介立篇爲之丞輔注丞佐也贊者周禮太卜贊三兆三  
易三夢之占儀禮士冠禮宰自右少退贊命鄭皆釋爲  
佐涼者詩大明涼彼武王傳涼佐也釋文涼本亦作涼  
佐也助者說文云左也案古佐皆作左

尊由以用也

尊者左莊二十八年傳今令尹不尊諸仇讎注尊用也  
由者詩君子陽陽右招我由房傳由用也通作猶禮記  
雜記猶是附於王父也注猶當爲由由用也又同繇漢  
書司馬相如傳則仁者不繇也師古曰繇讀與由同用  
也案說文無由字已部豈木生條也引商書若顛木之  
有叟繇以者易明夷彖傳文王以之虞翻注以用也詩  
谷風不我屑以箋云以用也案以用古通用書呂刑報

虐以威論衡作報虐用威詩板勿以爲笑荀子作勿用爲笑

要捷集載成也

要者詩緯今倡予要女傳要成也呂覽簡選篇以要甲子之事于牧野注要成也捷者左宣十二年傳事之捷注捷成也集者詩小旻是用不集箋云是非相奪莫適可從故所爲不成載者白虎通義載之言成也國語周語天地之所載也注地受天氣以成百物

肆赴捷疾也

肆者詩大明肆伐大商傳肆疾也正義曰左傳云輕者肆焉是肆爲疾之義赴者禮記少儀毋拔來毋報往注報讀爲赴疾之赴拔赴皆疾也捷者呂覽貴卒篇吳起之智可謂捷矣注捷疾也淮南兵略訓捷猝招杼船注

捷疾取也

造之如適也

造者詩篤公劉乃造其曹箋云適其牧羣莊子山木篇  
愛已而造哀也釋文引司馬注造適也之者禮記檀弓  
若魂氣則無不之也正義曰言無所不之適上或適於  
天旁適四方大學之其所親愛注之適也言適彼而以  
心度之如者春秋本義引陸希聲左傳通例自此適彼  
曰如

掇督撫拾也

掇者詩芣苢薄言掇之傳掇拾也督从叔目說文叔拾  
也徐鍇曰收拾之也詩九月叔苴傳叔拾也畢憲曾曰  
爾雅筑拾也注謂拾掇書金縢大木所偃則起而筑疏  
引鄭注禾爲木所偃者起其木拾其下禾乃無所亾失

也今本尙書作築掇筑督皆聲近潘氏錫恩曰說文撫安也徐鍇繫傳一曰掇也故與掇俱訓拾春秋傳司馬督漢書古今人表作司馬篤督篤同釋名篤築也尙書馬傳築拾也

肄子燼餘也

肄近本誤作肆今改正

肄者詩汝墳伐其條肄傳肄餘也斬而復生曰肄周禮小宗伯肄儀爲位注故書肄爲肆杜子春讀肆當作肄禮記玉藻肆束及帶注肆讀爲肄餘也義通髡曲禮斂髮毋髡注髡髮也毋垂餘如髮也髡或爲肄又聲轉爲葉爾雅作栱訓餘也說文作櫟云伐木餘也子者詩雲漢周餘黎民靡有子遺燼者詩桑柔具禍以燼箋云災餘曰燼正義曰燼是焦燭旣然之餘以比兵窮災害民之餘左成二年傳請收合餘燼注燼火餘木方言子燼

餘也周鄭之間曰蓋或曰子徐楚之間曰子自關而西秦晉之間欵薪不盡曰蓋案蓋燼同說文作夷火餘木也

拓斥啓闢開也

拓者後漢書竇憲傳恢拓境宇注拓開也通作析淮南原道訓析八極注析開也斥者漢書惠帝紀視作斥土者如淳曰斥開也開土地爲冢壙故以開斥言之啓者左隱元年傳夫人將啓之注啓開也論語泰伯篇啓予足啓予手集解引鄭注啓開也案經傳俱以啓開通用闢者易繫辭傳其動也闢注動則闢開以生物又闢戶謂之乾虞翻注闢開也通作辟詩召旻日辟國百里傳辟開也

杜實充物塞也



杜者周禮大司馬犯令陵政則杜之注引王霸記杜之者杜塞使不得與鄰國交通國語晉語狐突杜門不出一切經音義五引賈逵注杜塞也實者廣雅釋詁實塞也詩定之方中秉心塞淵箋訓充實充者詩旄邱衰如充耳箋云充耳塞耳也物者下文物滿也此訓爲塞義相引也

實物滿也

實者詩節南山有實其猗傳實滿也禮記玉藻盛氣顛實揚休注盛身中之氣使之聞滿其息若陽氣之體物也物者詩靈臺於物魚躍傳物滿也通作仞司馬相如子虛賦充仞其中者不可勝記

獎率勵勸也

獎者方言獎欲也晉趙曰獎自關而西秦晉之間相勸

或曰獎漢書何武傳獎稱人之善師古曰獎勸也亦作將漢書衡山王傳皆將養勸之注將讀曰獎率者書益稷率作興事勵當作厲周書和寤解王乃厲翼於尹氏八士注厲獎厲也漢書武帝紀以厲賢材焉師古注以獎厲賢材之人是皆有勸義也

勤勉事力也

勤者說文云勞也从力熒省熒火燒門用力者左僖二十八年傳令尹其不勤民注盡心盡力無所愛惜爲勤勉者說文云彊也又弓部彊弓有力也左昭二十年傳勉之注勉謂努力事者周禮鄉師凡邦事令作秩敘注事功力之事

淫屑省過也

淫舊本作經文選七發注引爾雅淫過也案爾雅無此

文今據改左昭元年傳淫生六疾注淫過也屑者書多  
士大淫泆有辭釋文泆又作份馬本作屑云過也省者  
史記秦本紀飾省宜義正義省過也通作省書說命惟  
干戈省厥躬釋文省本作省洪範王省惟歲宋世家作  
省康誥人有小罪非省釋文省本作省

闕缺閒隙也

闕者左僖二十六年傳彌縫其闕釋名闕在門兩旁中  
央闕然爲道也案闕隙聲之轉缺與闕義同閒者說文  
云隙也徐鍇曰門夜閉閉而見月光是有閒隙也

迭遞交更也

迭者禮記禮運五行之動迭相竭也注五行運轉更相  
爲始也遞者說文云更易也國策齊策六國之遞甚也  
注遞更也楚辭招魂射遞代些注同交者呂覽務大篇

交相爲贅注交更也

燬剗沒滅也

燬者左襄二十六年傳王夷師燬注吳楚之間謂火滅爲燬剗者國策齊策剗而類破吾家注剗滅也呂覽權勛篇必剗若類又觀世篇以兵相剗注皆訓滅也沒無也已見上文又爲滅者下文滅沒也轉相訓左襄二十四年傳何沒沒也注沒沒沉滅之言

玄黔驪黝黑也

元者爾雅釋天九月爲元李巡曰陰氣侵元其色皆黑夏小正八月元校傳元也者黑也黔者說文云黎也秦謂民爲黔首謂黑色也周謂之黎民易說卦傳爲黔喙之屬馬融曰黔黑也左襄十六年傳邑中之黔釋文黔黑也驪者禮記檀弓夏后氏尙黑戎事乘驪注馬黑色

曰驪爾雅釋畜盜驪注驪純黑色黝者說文云微青黑色周禮牧人陰祀用黝牲又守祧其祧則守祧黝聖之鄭司農皆讀爲幽疏謂幽是北方其色黑詩隰桑其葉有幽傳幽黑色也又禮記玉藻幽衡注幽讀爲黝爾雅釋器黑謂之黝又釋宮地謂之黝郭謂黑飾地也義通泐山海經西山經北流注于泐水注泐水色黑也

縞皓素白也

縞者詩東門縞衣綦巾傳縞衣白色禮記王制縞衣而養老注殷尙白而縞衣裳皓者詩揚之水白石皓皓傳皓皓潔白也孟子滕文公篇皜皜乎不可尙已注皜皜甚白也案皜與皓同素者說文云白緻繒也詩羔羊素絲五紵傳素白也禮記禮器或素或青注素尙白

彤髹縹朱也

彤者詩彤弓彤弓朱弓也特說文作辟云赤國土也經典相承作辟詩闕宮享以辟犧縉者禮記玉藻縉紱幽衡注縉赤黃之間色

### 淫溢沈滅沒也

淫者淮南覽冥訓積蘆灰以止淫水注平地出水爲淫水溢者詩周頌假以溢我箋云溢盈溢之言也沈者國策秦策城之不沈者三板耳注沈沒也史記酷吏傳作沈命法索隱引韋昭說沈沒也滅者易噬嗑初九履校滅趾正義曰校之在足已沒其趾荀子臣道篇闇主妒賢畏能而滅其功注滅淹沒也

### 載功物事也

載者詩文王上天之載傳載事周禮載師注載之爲言事也事民而稅之案書堯典有能奮庸熙帝之載史記

載作事漢書揚雄傳上天之絳絳與載通廣雅絳事也  
功者易隨九四象有孚在道明功也注能幹其事而成  
其功詩七月載績武功傳功事也物者易繫辭傳惟其  
時物也注物事也詩烝民有物有則傳物事正義曰凡  
言萬物則萬事也故以物爲事

小爾雅疏證卷二

嘉定葛其仁學

廣言二

說文云直言曰言古亦以一字爲一言論語  
連舉二字或僅釋一字皆廣爾雅所未備

晏明陽也

晏者說文云天清也文選揚雄羽獵賦天清日晏注引  
許慎淮南子注晏無雲之處也顏師古漢書注同明者  
史記五帝紀幽明之占正義明陽也淮南墜形訓東方  
曰開明之門注明者陽也日之所出故曰開明之門  
肝晏晚也

肝者左襄十四年傳日肝不召注肝晏也漢書張湯傳  
湯每朝奏事語國家用日肝師古曰肝晚也論事既多  
至於日晚晏者論語子路篇何晏也皇侃疏晏晚也國



語越語蚤晏無失注晏晚也

算麗數也

算數也已見爾雅復釋之者疑後儒竄入矣麗者詩文王其麗不億傳麗數也正義曰以億是數名故知麗爲數也方言數數也郭注偶物爲數故云數也案麗麗一字

叟艾老也

叟者孟子梁惠王篇叟不遠千里而來注叟長老之稱猶父也國語齊語合羣叟注叟老也案三老五更蔡邕以更字爲叟云三老國老也五叟庶老也又以三老爲三人五叟爲五人通作叟左宣十二年傳趙叟在後注叟老稱也艾者禮記曲禮五十曰艾注艾老也方言東齊魯衛之間凡尊老謂之叟或謂之艾

僉皆同也

僉者書舜典僉曰伯禹作司空某氏傳四岳同辭而對是僉爲同也皆者管子幼官篇偕度量注偕同也案偕皆通又習故能偕注偕謂同爲事

交校報也

交亦通校淮南時則訓虎始交注交讀如將校之校校者左僖二十三年傳有人而校注校報也論語泰伯篇犯而不校包咸曰校報言見侵伐不報

舒布展也

舒者方言云東齊之間凡展物謂之舒物素問氣交變大論其氣舒啓注疏展也布者包咸論語寢不尸注布展手足似死人布展連文

揚翦舉也

揚者易大有象辭君子以遏惡揚善虞注揚舉也禮記檀弓杜蕢洗而揚解注舉爵於君也義通媵儀禮燕禮升媵觶於賓注媵送也讀或爲揚舉也翫者說文云飛舉也方言云舉也楚謂之翫

索略求也

索者易說卦傳震一索而得男王肅注索求也禮記曲禮大夫以索牛注求而得用之又郊特牲蜡也者索也注謂求索也孔安國尙書序八卦之義謂之八索求其義也略者方言云求也就室曰摻於道曰略

奚害何也

奚者禮記檀弓吾欲暴尫而奚若注奚若何如也害者詩葛覃害澣害否箋云我之衣服今者何所當見澣平何所當否乎又泉水不瑕有害箋云害何也二子乘舟

不瑕有害鄭亦訓何案害與曷同書湯誓時日曷喪孟子引作害喪說文曷何也

里度居也

里者爾雅釋言里邑也注謂邑居詩將仲子兮無踰我里又十月之交悠悠我里傳皆訓居周禮載師以廛里任國中之地注廛里者若今之邑里居矣度者詩緜度之薨薨傳度居也又皇矣爰究爰度傳同左文十八年傳不度於善注度居也案古文宅度同書宅西周禮縫人注引作度西五流有宅史記作五流有度

周挾帀也

周者禮記檀弓四有皆周注周帀也說文無挾字挾卽挾詩大明使不挾四方傳挾達也正義曰挾者周匝之義故爲達周禮所謂挾日挾卽今之匝義同也案今本

周禮作挾荀子禮論方皇周挾楊倞注挾巾也

充該備也

充者公羊桓四年傳充君之庖注充備也該者穀梁哀元年傳此該之變而道之也注該備也楚辭齊桓聞以該輔注該備也備輔佐也依字當作𦉳國語吳語𦉳姓于王宮注𦉳備也

列厥陳也

列者漢書司馬遷傳論列是非師古曰列陳也厥未詳王寶仁曰疑厥字之譌案說文云厥陳輿服于庭也周禮司服厥衣服鄭司農曰厥陳也

輶輶輿也

輶者漢書景帝紀令長吏二千石車朱兩輶千石至六百石朱左輶應劭謂車耳反出所以爲之藩屏翳塵泥

也師古曰據許慎李登說轎車之蔽也左氏傳云以藩  
載欒盈卽是有郭蔽之車也周禮巾車漆車藩蔽鄭注  
藩今時小車輶者說文云輶也考工記輶人爲輶注輶  
車輶也詩云五檠梁輶

廢措置也

廢者公羊宣八年傳廢其無聲者注廢置也鄭志答張  
逸云廢置也於去聲者爲廢謂廢畱不去也案左傳廢  
六闕家語作置六闕措者禮記月令措之于參保介之  
御問注置耒于車右與御者之間又禮器措則正注措  
置也通作錯論語爲政篇舉直錯諸枉包曰廢置邪枉  
之人爾雅釋天錯革烏曰旗公羊疏引孫炎曰錯置也  
駕乘陵也

駕者左昭元年傳猶詐晉而駕焉注駕乘陵也乘者國

語周語乘人不義注乘陵也呂覽貴直篇一鼓而士畢乘之注義同

收戢斂也

收者儀禮士冠禮夏收注收言所以收斂髮也禮記學記收其威也注謂收斂整齊之戢者詩桑扈不戢箋云不自斂以先王之政又鴛鴦戢其左翼鄭亦訓斂通作輯書舜典輯五瑞史記作揖五瑞注引馬融云揖斂也禁錄也

禁未詳當爲麓字之譌書舜典納于大麓伏生大傳納之大麓之野康成注山足曰麓麓者錄也堯命舜陟位居攝致天下之事使大錄之

掌司主也

掌者書周官冢宰掌邦治傳主國政治孟子滕文公篇

我使掌與女乘注掌主也司者詩羔裘邦之司直傳司主也禮記文王世子樂正司業父師司成注司主也正義曰司是職司故爲主

偏贅屬也

偏者左襄三年傳舉其偏杜注偏屬也正義曰偏者半廂之名故傳多云東偏西偏軍師屬已分之別行謂之偏師傳云莧子以偏師陷是偏爲廂屬之名也贅者詩桑柔具贅卒荒傳贅屬箋云皆見繫屬於兵役尙書大傳太王亶甫贅其耆老而問之鄭注贅爲屬案孟子作屬其耆老釋名贅屬也橫生一肉屬著體也

麗著思也

麗亦通著左宣十二年傳射麋麗龜服注麗著也著者禮記祭義致愬則著鄭訓爲思念案門屏之間曰著鄭



明堂位注屏謂之櫺今桴思也正義曰人臣至屏俯伏  
思念其事又案桴思卽呆思釋名呆復也思思也臣將  
入請事於此復重思之也

載略行也

載者書舜典有能奮庸熙帝之載鄭注載行也淮南俶  
眞訓日月無所載注載行也略者左隱五年傳吾將略  
地焉注略總攝巡行之名又宣十一年傳略基趾昭十  
二年傳荀吳略東陽注皆訓行也

沓襲合也

沓者開元占經引巫咸云諸舍精相沓爲合楚辭天問  
天何所沓注沓合也揚雄羽獵賦天與地沓文選注引  
應劭曰沓合也襲者禮記少儀劍則啓櫝蓋襲之注襲  
卻合之淮南天文訓天地之襲精爲陰陽注襲合也

抵享當也

抵者管子小問篇寡人之抵罪也久矣注抵當也史記高祖紀傷人及盜抵罪應劭曰抵至也又當也漢書武帝紀作角抵戲文穎曰名此樂爲角抵者兩兩相當角力角技藝射御故名角抵享者書咸有一德克享天心某氏傳享當也正義曰德當神意神乃享之故以享爲當也漢書韋元成傳靖享爾位師古曰享當也

庚徹道也

庚者詩序由庚萬物得由其道也左成十八年傳以塞夷庚注夷庚吳晉往來之要道徹者詩十月之交天命不徹傳徹道也箋云不道者王不循天之政敎案爾雅釋言不徹不道也

脩舒長也

脩者詩六月四牡修廣傳修長禮記投壺壺頸修七寸  
腹修五寸注修長也爾雅釋宮陝而修曲曰樓郭訓修  
爲長淮南鴻烈篇避父諱以長爲修舒展也已見上又  
訓爲長者義理相承以意釋之

### 校戰交也

校者淮南兵略訓野無校兵注敵家之兵不來相交復  
也戰者說文云接也公羊莊十年傳戰不言伐注合兵  
血刃曰戰

### 謁復白也

謁者左昭四年傳入弗謁杜注謁白也國策秦策臣請  
謁其故注謁白也漢書公卿百官表謁者掌賓讚受事  
應劭曰謁請也白也復者禮記曲禮願有復也注言欲  
須少空閒有所白也左成二年傳若苟有以藉口而復

于寡君注復白也

勅質正也

勅者書臯陶謨勅我五典通作飭呂覽季冬紀飭國典注飭讀爲勅勅正國法又通飾呂覽舉難篇難爲非則行飾注飾讀曰勅勅正也質者周禮祖祝以質邦國之劑信注質正也儀禮士冠禮宰告曰質明行事注質正也

齋蔑末也

齋者左昭二十九年傳有齋子曰董父注元孫之後爲齋國語晉語延及寡君之紹續昆齋注齋末也漢書藝文志六經之支與流齋師古曰齋末也蔑通作賤釋名目眚傷末曰賤賤末也創在目兩末也又通憊廣雅釋詁憊末也

延衍散也

延衍音義俱近漢書武帝作漫衍之戲張衡西京賦是謂曼延是延與衍同故同訓散文選揚雄甘泉賦駢交錯而曼衍兮注曼延分布也是有散義

末沒終也

末者儀禮公食大夫禮皆卷自末注末經所終周書諡法解萬子孫用末被先王之靈光注末終沒依字當作殤亦作殤經典通作沒易繫辭傳庖犧氏沒虞翻注沒終也儀禮士昏禮若舅姑既沒禮記檀弓不沒其身鄭皆訓終

低辨別也

低者詩中谷有蕓有女低離傳低別也箋云有女遇凶年而見棄與其君子別離辨者易繫辭傳困德之辨也

鄭注辨別也周禮辨方正位注辨別也引鄭司農曰別四方

菲涼薄也

菲者禮記坊記故君子不以菲廢禮注言不可以其薄而不及禮而不行禮論語泰伯篇菲飲食馬融曰菲薄也通作餽史記三王世家毋餽德索隱引孔文祥說訓餽爲薄涼者詩桑柔職涼善背傳涼薄正義曰涼者薄之別名左莊三十二年傳號多涼德左昭四年傳君子作法於涼杜皆訓薄也

復旋還也

復者書舜典卒乃復正義引釋言云還復返也是還復同義旋者禮記玉藻周還中規折還中矩釋文還本亦作旋左文十八年傳行父還觀莒僕注還猶周旋旋還

轉相訓也

祖翼送也

祖者祭行道之神詩韓奕韓侯出祖箋云將去而祀軼也白虎通義其工之子曰修好遠遊故祀以爲祖神一名軼生民詩取羝以軼聘禮出祖釋軼周禮太僕及犯軼遂驅之一名道禮記曾子問道而出是一祭而三名其制於國外委土爲山伏牲其上天子以犬諸侯以羊卿大夫用酒脯以菩芻棘柏爲神主旣祭以車轢之而去於時送者飲酒於祖側曰餞餞送也詳見詩生民正義漢書景十三王傳祖于江陵師古曰祖者送行之祭因饗飲也昔黃帝之子累祖好遠遊而死于道故後人曰爲行神也翼未詳潘氏錫恩曰書多士非我小國敢弋殷命正義稱鄭氏作翼引鄭注翼猶驅也文選注引

倉頡篇隨後曰驅詩太叔于田傳從禽曰送正義申之  
曰送爲逐後故知從禽案翼訓驅驅爲隨後送亦爲逐  
後故以送釋翼也

走卬我也

走者司馬遷與任安書太史公牛馬走文選注言已爲  
太史公掌牛馬之僕張衡東京賦走雖不敏注自稱走  
使之人如今言僕矣卬我也已見爾雅疑爲後儒所加  
姓命孳子也

姓者說文云姓人所生也古之神聖母感天而生子故  
曰天子左昭四年傳問其姓注問有子否命者國語周  
語不亦嬪姓矣乎注引賈唐注姓命也命與姓義同故  
亦訓爲子孳者詩常棣樂爾妻邵傳帑子也案經典皆  
作帑



諧籲和也

諧說文作諧云樂和諧也引書八音克諧書堯典克諧以孝史記作克和以孝左襄十一年傳如樂之和無所不諧注諧亦和也籲者書盤庚率籲衆慼某氏傳籲和也案籲从頁籥聲說文籥樂之竹管三孔以和衆聲也故訓爲和

悛寤覺也

悛止也已見廣詁以爲覺者左襄二十八年傳亦無悛志注悛改寤也是悛與寤同義寤者詩關雎寤寐求之傳寤覺又碩人獨寐寤言箋云在澗獨寐覺而獨言周禮占夢四曰寤夢注覺時道之而夢又司寤注寤覺也主夜覺者

憾猜恨也

憾者禮記中庸人猶有所憾注憾恨也左隱五年傳叔父有憾于寡人宣二年傳以其私憾注皆釋爲恨猜者說文云恨賊也左僖九年傳耦俱無猜注兩無猜恨艾盡止也

艾者詩庭燎夜未艾左哀二年傳憂未艾也皆有止義盡者荀子正名篇欲雖不可盡可以近盡也注適可而止也

擱忿也

擱者方言云猛也晉魏之間曰擱楊倞荀子注引方言作倜案說文無擱字人部倜釋云武兒从人間聲引詩瑟兮倜兮左昭十八年傳今執事擱然授兵登陣注擱然勁忿貌

奸犯也

奸者左昭二十四年傳是再奸也注奸犯也通作干書  
肩征以干先王之誅傳干犯也周書武順解危言不干  
德曰正注不干謂不妃也

汨猾亂也

汨者書洪範汨陳其五行案義通汨呂覽本生篇水之  
性清土者汨之故不得清人之性壽物者汨之故不得  
壽注汨讀曰骨濁也又亂也猾者書舜典蠻夷猾夏鄭  
康成曰侵亂中國也案說文無猾字當作滑周語滑夫  
二川之神注滑亂也史記子欲聞六律五聲八音來始  
滑今本尚書作在治忽忽與治義相反是滑爲亂也  
縮讀抽也

縮者詩巷伯傳使執燭放乎旦而蒸盡縮屋而繼之正  
義曰縮抽也薪盡乃抽取屋草以繼之案廣韻亦云縮

抽也知縮縮一字讀者詩牘有茨不可讀也傳讀抽也  
顏師古匡謬正俗曰抽當爲籀籀讀也从竹播聲播卽  
古抽字

暨捷及也

暨不及也見爾雅暨又訓爲及者禮記喪大記塗不暨  
於棺注暨及也捷者漢書揚雄傳豈駕鵠之能捷晉灼  
曰捷及也

苞跋本也

苞者詩下泉浸彼苞稷又斯干如竹苞矣傳皆訓本亦  
作包易否繫于包桑陸績注包本也跋者禮記曲禮燭  
不見跋注跋本也

肆臬極也

肆者左昭十二年傳昔穆王欲肆其心注肆極也國語

周語數澤肆既注肆極也臬法也已見廣詁又爲極者  
說文臬射準的也漢書司馬相如傳藝殪仆文穎曰所  
射準的爲藝師古曰藝謂射的讀與藝同字亦作臬案  
左昭十三年傳貢之無藝服注藝極也魯語貪無藝也  
晉語貪欲無藝注皆訓極故訓臬爲極也

睇題視也

睇者說文目小眇視也禮記內則睇視注睇傾視也引  
易曰明夷睇于左股正義引彼注云旁視爲睇夏小正  
燕乃睇傳睇者眇也眇者視可爲室者也題者詩小宛  
題彼脊令傳題視也箋云題之爲言視睇也

犯肆突也

犯者說文犯侵也从犬已聲荀子王霸篇汗漫突盜注  
突謂相陵犯也犯之爲突轉相訓肆者詩皇矣是伐是

肆箋云肆犯突也

束縻縛也

束者周禮羽人十搏爲縛注縛束名也說文亦云縛束也轉相訓縻者說文云牛轡也亦作靡荀子正論藉靡舌繮注靡繫縛也

肆從遂也

肆突也見上又爲遂者周禮鐘師肆夏呂叔玉云肆遂也夏小正貍子肇肆注肆遂也言其始遂也從者文選嵇康與山巨源絕交書能遂其志注引國語賈逵注遂從也又間居賦注引聲類遂從意也此轉相訓

放投棄也

放者漢書哀帝紀聖王所放師古曰放棄也淮南修務訓放驩堯于三苗注放棄也投者詩巷伯投畀豺虎傳

投棄也左文十八年傳投諸四裔注投棄也正義曰投者擲去故爲棄也

莽蕪草也

莽者說文𦰇衆草也从四艸又莽南昌謂犬善逐蕪艸中爲莽从犬𦰇左哀元年傳暴骨如莽注草之生于草野莽莽然故曰草莽爾雅釋草莽數節注竹類也是草亦有名莽者蕪說文蕪也从草無聲釋草蕪蘆蕪蕪注香草又須蕪蕪注蕪以羊蹄葉細味酢可食

暴映曬也

暴者說文曬暴也方言曬暴也凡暴五穀之類秦晉之間謂之曬故暴可訓曬也說文無映字華嚴經音義引字書映仿照也

煇晞也

燉者左昭十八年傳行火所燉注燉炙也說文無燉字  
當爲斯日部斯旦明日將出也从日斤聲讀若希

晞乾也

晞者詩蒹葭白露未晞傳晞乾也又湛露匪陽不晞傳  
晞乾也露雖湛湛然見陽則乾禮記玉藻髮晞用象櫛  
注晞乾也

迪迹蹈也

迪者法言先知篇爲國不迪其法注迪蹈也說文迪道  
也書各迪有功史記作各道有功案道蹈古通列子黃  
帝篇向吾見子道之注道當作蹈荀子禮論道及士大  
夫注史記道作蹈迹說文步處也淮南說山訓足躋足  
而爲迹注躋履也莊子庚桑楚釋文引司馬彪注躋蹈  
也通作蹟爾雅釋訓不蹟不道也



衍演廣也

近本廣字下多一遠字据文選七啓注引演廣也刪

衍者易繫辭傳大衍之數釋文引王蜀注衍廣也演者說文長流也釋名演延也言蔓延而廣也

袤從長也

袤者說文云南北曰袤東西曰廣漢書溝洫志渭中袤二百里師古曰袤長者從如詩衡從其畝之從韓詩作橫由其畝云南北耕曰由

荷揭檐也

荷者詩濬哲何天之休箋云檐負天之美譽左昭七年傳其子弗克負荷注荷檐也爾雅釋天何鼓謂之牽牛注今荆楚人呼牽牛星爲檐鼓檐者荷也案檐檐同揭說文高舉也又竭負舉也竭揭通詩候人何戈與楯又無羊何蓑何笠傳皆訓揭荷揭本同義禮記禮運迭相

竭也釋文竭義作揭

仍再也

仍者爾雅釋天仍饑爲荐又釋言荐再也故仍有再義徇肆也

肆當爲肆二字經典通用徇者史記五帝紀幼而徇齊注徇疾也廣詁肆疾也徇肆同義

工官也

工者書堯典允釐百工史記作信飭百官詩臣工傳工官也

稽考也

稽者易繫辭傳於稽其類注稽猶考也周禮小司徒稽國中及四郊都鄙之夫家九比之數注稽猶考也顛隕也

顛者易雜卦傳大過顛也虞注顛隕也左哀十一年傳  
顛越不恭服注同

躋陞也

已見爾雅

戕殘也

戕者書梓材戕敗人宥鄭注戕殘也詩十月曰予不戕  
箋云戕殘也左定十四年傳將戕于余注戕殘殺也

剽截也

剽說文作剽引夏書天用剽絕其命漢書王莽傳征伐  
剽絕之矣注剽截也又通櫟漢書外戚傳命櫟絕而不  
長注櫟截也

辟除也

辟者周禮小司寇前王而辟鄭司農曰爲王道辟除姦

人也孟子離婁篇行辟人可也注辟除人

恩患也

恩者左昭六年傳主不恩賓注恩患也

謫責也

謫者方言南楚以南凡相非議人謂之謫詩北門室人  
文徧謫我傳謫責也左成十七年傳國子謫我注謫謫  
責也謫謫同又作適孟子離婁篇人不足與適也注不  
足過責也漢書食貨志故吏皆適令伐棘上林師古曰  
適讀曰謫謫責罰也

問非也

問者論語先進篇人不問於其父母兄弟之言注人不  
得有非問之言孟子政不足與問也注政教不足復非  
順退也

未詳潘氏錫恩曰集韻順古作巡文選注引郭璞爾雅注逡巡卻去也巡又作遁漢書平當傳逡遁有恥師古曰遁與巡同鄉射禮賓少退鄭注少逡遁也順巡遁字異義同

抗禦也

抗者儀禮既夕抗木注抗禦也所以禦止土者荀子禮論抗折其須注抗禦也通作亢左宣十三年傳而亢大國之討注亢禦也

靳取也

靳與靳通太史公自序錯孫靳徐廣曰一作靳荀子儒效篇跨天下而無靳注靳求也案求取義同王寶仁曰取當作耻之譌左傳服注耻而惡之曰靳

蚩戲也

蚩者一切經音義引蒼頡篇蚩相輕侮也又蚩笑也通作吹陸機文賦或受吹于拙目

褊狹也

褊者楚辭初放淺智褊能今注褊狹也

憖忌也

憖者說文云毒也左定四年傳憖間王室哀元年傳憖澆能戒之杜皆訓毒此釋爲忌者因聲取義

沮疑也

沮者禮記儒行沮之以兵注沮謂恐怖之也案說文無沮字當作阻左閔二年傳狂夫阻之注阻疑也

虧損也

虧者說文云氣損也淮南精神訓無天下不虧其性注虧損也

毀壞也

毀者國策秦策壹毀魏氏之威注毀敗也孝經釋文引蒼頡毀破也是有壞義

判散也

判者詩訪落繼猶判渙傳判分渙散也

蔽斷也

蔽者左昭十四年傳叔魚蔽罪邢侯注蔽斷也義通弊周禮天官弊羣吏之治注弊斷也

交俱也

交者國語晉語苟交利而得寵注交俱也呂覽貴當篇皆交爭證諫注交俱也

俘罰也

俘當据孔氏正義改作浮禮記投壺偕立踰言有常爵

又若是者浮鄭注常爵常所以罰人之爵也浮亦謂是也正義引小爾雅曰浮罰也案浮罰一聲之轉

夷傷也

夷者易序卦傳夷者傷也左成十三年傳芟夷我農功注夷傷也

枳害也

枳者山海經西山經枳葉而多傷注枳刺針也孔叢子形論率過以小謂之枳注一作痕猶傷也

締閉也

締者說文云締結不解也楚辭九章氣縑轉而自締

靡細也

靡者周禮司市靡者使微注侈靡細好使富民好奢微之而已禮記月令靡草死正義以其枝葉靡細故謂之



靡草呂覽本生篇靡曼皓齒注靡曼細肌美色也揚子  
方言在齊言布帛之細曰綾秦晉曰靡

辨使也

辨者書酒誥勿辨乃司傳辨使也案辨與俾聲之轉書  
序王俾榮伯作賄肅慎之命馬本俾作辨爾雅俾使也  
故辨訓爲使說文作辯云治也治使義亦相近

牧臨也

牧者周禮建其牧牧有臨民之義故釋爲臨方言監牧  
察也牧與監同義說文監臨下也

嘗試也

嘗者禮記檀弓盍嘗問焉注嘗猶試也左隱元年傳嘗  
寇而速去之注嘗試也

賴靡也

賴者國語齊語相示以賴注賴羸也又晉語尸賴其地  
注同

若乃也

若者禮記祭統若纂乃初服注若乃猶女也國語周語  
若能有濟也注若猶乃也

嗟發聲也

嗟者釋名嗟佐也言之不足以盡意故發此意以自佐  
也爾雅釋詁嗟咨也文選注引舊注云嗟楚人發語端  
也

奏爲也

奏者詩六月以奏膚公傳奏爲

振救也

振者禮記月令振乏絕注振猶救也左昭十四年傳分

貧振窮注振救也

庸償也

庸說文用也从用从庚案疑爲庚之譌禮記檀弓請庚之注庚償也

賈價也

賈者說文云物直也周禮天官賈人注賈主市買知物價案賈價古今字漢書價皆作賈說文無價字正作賈

贍足也

贍者孟子公孫丑篇力不贍也注贍足也呂覽順民篇愁悴不贍者注贍猶足也通作詹適音篇不充則不詹注訓足讀如澹然無欲之澹案說文無贍字當作澹漢書食貨志以澹其欲師古曰澹古贍字淮南原道訓富

澹天下注澹足也

曹偶也

曹者說文云獄之兩曹也楚辭招魂分曹並進注曹偶也

麗兩也

麗者方言云偶物爲麗案易離麗也又麗澤兌皆有兩義通作儷儀禮士冠禮注儷皮兩皮也又通離禮記曲禮離坐離立注離兩也

驟數也

驟者左文十四年傳公子商人驟施于國注驟數也又哀十四年傳驟顧諸朝注心不安故數顧之逸周書太子晉解王子曰太師何舉足驟師曠曰天寒足踣是以數也孔晃注驟亦數也

逞快也

逞者左桓六年傳今民餓而君逞欲注逞快也案又爲急疾之意方言逞疾也楚曰逞今俗語猶謂疾爲快矣越遠也

越者左襄十四年傳越在他竟注越遠也國語周語氣不沈滯而亦不散越注同

姑且也

姑者詩卷耳我姑酌彼金罍傳姑且也禮記內則姑與之而姑使之注姑猶且也逸周書周祝解惡姑幽惡姑明惡姑陰惡姑陽惡姑短長惡姑剛柔注姑者且也

哿可也

哿者詩正月哿矣富人傳哿可又雨無正哿矣能言傳哿可矣可矣世所謂能言者也

釋解也

釋者左襄二十九年傳釋不朝正于廟也注釋解也通作澤詩載芟其耕澤澤正義曰釋釋然土皆解散夏小正農及雪澤注雪澤猶凍解也

庸善也

庸者禮記正義引鄭目錄中庸者以其記中和之爲用也案廣雅釋詁庸和也高誘注呂覽貴公篇善猶和也和與善義相近故訓庸爲善也

荐重也

荐者左僖十三年傳晉荐饑注荐重也字或作薦詩雲漢饑饉薦臻傳薦重也又作洊易水洊至又洊雷並謂重也

登升也

登陞也已見爾雅案古字只作升周禮羊人登其首注  
登升也左隱五年傳不登于俎服注登爲升

勵勉也

勵勸也見廣詁又爲勉者後漢書劉虞公孫瓚陶謙傳  
贊襄賁勵德注勵勉也通作厲漢書儒林傳序以厲賢  
材焉師古曰厲勸勉之也

赫顯也

赫者詩生民以赫厥靈傳赫顯也又常武赫赫鄭訓爲  
顯著

遯是也

遯者左隱十一年傳犯五不遯注遯是也案洪範五者  
來備後漢書李雲傳作五氏來備注是與氏古字通又  
荀爽傳五遯咸備注遯是也

不莊也

丕者爾雅釋詁丕大也莊壯通莊子天下篇不可與莊語莊一作壯檀弓柳莊漢書古今人表作柳壯方言樊大也秦晉之間凡人之大謂之樊或謂之壯

佞才也

佞者左成十二年傳寡人不佞服虔注佞才也不才者自謙之辭也

堅息也

堅者詩谷風伊余來塋又假樂民之攸堅傳俱訓爲息案爾雅釋詁咽息也堅咽古今字

話善也

話者說文云古會善言也詩板出話不然又抑慎爾出話傳皆訓善言書正義引舍人爾雅注話政之善言也



愿謹也

愿者左襄三十二年傳愿吾愛之注謹善也詩衡門序愿而無立志釋文愿謹也

丰豐也

丰者詩子之丰今傳丰豐滿也箋云面貌丰丰然豐滿善人也案丰豐義音皆同

都盛也

都者詩有女同車洵美且都傳都閑也正義曰都者美好閑習之言案廣雅釋訓閑閑盛也故都亦爲盛

腆厚也

腆者左僖三十三年傳不腆敝邑文十二年傳不腆敝器注皆訓厚

肆緩也

肆者左襄九年傳肆皆注肆緩也淮南本經訓寬而不肆注肆緩也

競逐也

競者詩桑采職競用力箋云競逐也又長發不競不綖箋同莊子齊物論有競有爭注並逐曰競

紀基也

紀者詩終南有紀有堂傳紀基也正義曰以下文有堂故以爲基謂山基也

基忌敎也

基者左宣十二年傳楚人基之注基敎也文選張衡西京賦人基之謀薛綜注基敎也忌者王光祿鳴盛尙書後案曰說文心部基毒也从心其聲周書曰來就基基今周書無此文詳考之此經未就予忌當卽是也來與

未形相似甚與忌聲相亂而誤案甚忌一字甚訓教故忌亦訓教

愁願也

愁者國語吾語以愁御人注愁願也楚語吾愁置之於耳注愁猶願也

愁強也

愁又爲強者詩十月不愁遺一老箋愁者心不欲自強之辭也正義曰說文愁肯從心也言初時不欲後始勉強而肯從

愁且也

詩十月釋文引爾雅云願也強也且也案爾雅無此文當卽此處脫文今補

愁又爲且者說文愁肯也肯舊謹敬也从心愁聲一曰

說也一曰且也且舊左哀十六年傳不愁遺一老注愁

且也

薄迫也

薄者左僖二十二年傳半涉而薄我文十二年傳薄諸河注皆訓迫

燁炊也

燁者左昭三十年傳燁之以薪注燁炊也

資取也

資者攷工記或通四方之珍異以資之注資取也禮記明堂位天下資禮樂焉注資取也

質信也

質者左昭十六年傳與蠻子之無質也注質信也又哀二十二年傳先主與吳王有質注質盟信也

餽饋也

餽說文作氣云饋客芻米也从米气聲春秋傳日齊人

來氣諸侯一切經音義引埤蒼餽饋也

憑依也

憑本作馮左哀元年傳馮恃其衆注馮依也國語周語  
丹朱馮身以儀之注馮依也說文作凭云依几也引書  
顧命凭玉几

藉借也

藉者左僖二十八年傳藉之告楚注報借齊秦使爲宋  
請孟子滕文公篇助者藉也注藉者借也猶人相借力  
助之也說文無借字卽作藉藉借一字通作籍詩載芟  
箋籍之言借也借民力爲之故謂之籍田

際接也

際者左昭四年傳叔孫爲孟鐘曰爾未際注際接也孟  
本與諸大夫相接見淮南本經訓上際青雲注際接也

通作療詩苑柳無自療焉箋云療接也

闕限也

闕者說文云外閉也一切經音義闕郭璞以爲古文礙字廣雅礙闕也法言問道篇礙諸以禮樂李軌注礙限廬寄也

廬者說文云寄也秋冬去春夏居詩公劉于時廬旅傳廬寄也

萃集也

萃者詩墓門有鴟萃止傳萃集也左成十六年傳三軍萃而王卒注萃集也

筵倅也

筵者左昭十一年傳使助蘧氏之筵注副倅也說文从艸作筵倅字說文無當爲萃周禮車僕掌戎路之萃廣

車之萃闕車之萃萃車之萃輕車之萃皆謂副貳也

尤怪也

尤者左昭二十一年傳張句尤之注尤怪也

曹慙也

曹者國語晉語苟使君曹注曹慙也

索空也

索者左昭十二年傳入索正義引延篤言張平子說八索周禮入議之刑索空空設之通作素左傳釋文索本作素詩伐檀不素餐兮傳素空也

素故也

素者儀禮喪服傳飯素食注素猶故也漢書高帝紀素易諸吏師古素故也

視比也

視者禮記王制天子之卿視伯天子之大夫視子男天子之元士視附庸注視猶比也左襄二十七年傳視邾滕注兩事晉楚則貢賦重故欲比小國

徨往也

徨依字當作皇國策以臨彷徨淮南子作方皇荀子禮論方皇周挾注方皇讀爲仿徨訓爲往者詩信南山先祖是皇注皇之言往也泮水烝烝皇皇箋皇皇當作睢睢睢睢猶往往也

矜惜也

矜者說文矛柄也今借爲憐惜之義詩鴻雁爰及矜人傳矜憐也呂覽懷寵篇而振恤之注矜恤案恤惜通  
狃狀也

狃者詩叔于田將叔無狃傳狃習也箋云狃復也正義



引孫炎爾雅注狃怏前事復爲也左桓十三年傳莫敖狃於蒲騷之役注狃怏也通作怏後漢書戴就傳怏行無義注怏怏也猶言慣習

覲望也

覲者左桓二年傳下無覲覲注下不冀望上位

何任也

何擔也已見上文又爲任者釋名擔任也任力所勝也擔訓任故何亦訓任

御侍也

御者詩六月飲御諸友箋御侍也又行葦授几有緝御箋同周禮女御注御猶進也侍也禮記曲禮御同於長者注侍食於長者

殿填也

殿者詩采芣殿天子之邦傳殿鎮也釋文鎮本作填漢書周勃傳擊章邯車騎殿師古曰殿之言填也謂鎮車後以扞敵

選擇也

選者國語晉語公選男德注選擇也管子小匡篇馬牛選具注選擇其善者

宣示也

宣者詩鴻雁謂我宣驕傳宣示也左宣九年傳公卿宣注注宣示也

小爾雅疏證卷二終



小爾雅疏證卷三

嘉定葛其仁學

廣訓三

說文云訓說教也詩正義訓者道也道物之貌以告人也通篇釋詩義居多問及語餘皆以究經傳之美蘊

通時俗之解詁

諸之乎也

諸者詩日月日居月諸照臨下土傳日乎月乎照臨之也之者論語學而爲告諸往而知來者孔安國曰諸之也案諸爲之於之合聲之諸同義故亦爲乎也

旃焉也

旃者詩采芩舍旃舍旃箋旃之言焉也案旃爲之焉之

合聲

惡乎於何也

惡乎者禮記檀弓吾惡乎哭諸釋文惡乎猶於何也又

吾惡乎用吾情注惡乎者猶於何也逸周書周祝解惡  
別之注惡於何也案或言惡乎或但言惡以聲之長短  
別之其義同也

烏乎吁嗟也吁嗟嗚呼也有所歎美有所傷痛隨事有義  
也

烏乎與嗚呼同說文引孔子曰烏旡呼也取其助氣故  
以爲嗚呼又呼外息也又吁驚也嗟古作嗟說文作詹  
谷也一曰痛惜也烏乎吁嗟轉相訓者欲人各隨文解  
之書周公曰嗚呼詩于嗟麟兮于嗟乎騶虞之類皆是  
歎美禮記嗚呼哀哉尼父詩于嗟閼兮于嗟洵兮之類  
皆是傷痛故曰隨事有義

無念念也無甯甯也

無念者詩文王無念爾祖傳無念念也正義謂反而言

之無甯者左隱十一年無甯茲許公注無甯甯也論語  
子罕篇無甯死於二三子之手也馬融曰無甯甯也  
無顯顯也不承承也

無顯當爲不顯詩清廟不顯不承傳顯於天矣見承於  
人矣箋是不光明文王之德與言其光明之也是不承  
順文王之意與言其承順之也又文王篇有周不顯傳  
不顯顯也

不肖不似也

說文肖骨肉相似也从肖小聲不似其先故曰不肖也  
禮記雜記某之子不肖注肖似也不似言不如人案肖  
通作宵漢書刑法志夫人宵天地之類師古曰宵義與  
肖同庸妄之人謂之不肖言其狀貌無所象似也

繩之譽之也

繩訓爲譽者左莊十四年傳蔡哀侯爲莘故繩息嫫以語楚子注繩譽也正義曰字書繩作繩从言訓爲譽呂覽古樂篇以繩文王之德注繩譽也

詰朝明日也

左成二年傳詰朝請見注詰朝明日十六年傳詰朝爾射死莒注詰朝猶明朝

遐不黃耇言壽考也

遐不黃耇詩南山有臺文傳云黃黃髮也耇老正義曰釋詁云黃髮耇老壽也舍人曰黃髮老人髮白復黃也孫炎曰耇面凍梨色如浮垢案爾雅郭注黃髮髮落更生黃耇耇猶耇也皆壽考之通稱疏引方言云秦晉之郊陳亢之會謂老爲耇駘又燕代北鄙謂耇爲梨又引舍人曰耇觀血氣精華觀竭言色赤黑如狗矣鄭訓南

山有臺第四章遐不眉壽爲近眉壽此不从不字連下讀與不顯不承一例不黃耆言壽考也破鄭義遐不作近解也

公孫碩膚德音不瑕道成王大美聲稱遠也

公孫碩膚德音不瑕詩狼跋文案上章公孫碩膚傳公孫成王也幽公之孫也碩大膚美也箋云公周公也孫讀當如公孫于齊之孫孫之言孫遁也此申毛不從鄭義正義曰傳以雅稱曾孫皆是成王以其是幽公之孫也碩大釋詁文膚美小雅廣訓文德音不瑕傳瑕過也箋云不瑕言不可疵瑕也案泉水不瑕有害又二子乘舟不瑕有害傳並訓爲遠瑕遐經傳通用此瑕字亦當訓遠故曰道成王大美聲稱遠也

鄂不韡韡言韡韡也



鄂不韡韡詩棠棣文傳鄂猶鄂鄂然言外發也韡韡光明也正義曰毛以爲常棣之木華鄂鄂然外發之時豈不韡韡而光明乎王肅曰不韡韡言韡韡也以興兄弟能內睦外禦則強盛而有光耀案釋文不毛如字鄭作拊云拊鄂足也鄂足得華之光明則韡韡然盛與毛義異此不从

我從事獨賢勞事獨多也

我從事獨賢勞詩北山文傳賢勞也箋云王不均大夫之使專以我有賢勞之故獨使我從事於役自苦之辭案廣詁訓賢爲多故從事獨賢爲勞事獨多與傳箋義異魴鱣甫甫語其大也麀鹿麀麀語其衆也

魴鱣甫甫麀鹿麀麀詩韓弈文今本作嘒嘒釋文本亦作麀毛傳甫甫然大也嘒嘒然衆也案詩甫田甫草傳

俱訓甫爲大故甫亦爲大爾雅釋詁甫大也吉日鹿  
鹿麋麋傳麋麋衆多也箋云麋復麋言多也說文喊麋  
鹿羣口相聚兒亦衆多之意

海物惟錯錯雜也

海物惟錯書禹貢文史記集解引鄭曰海物海魚也魚  
種類尤雜案錯訓雜者詩翹翹錯薪毛訓錯爲雜漢書  
中山靖王傳犬牙相錯師古曰錯雜也

雉毛曰毳

毳者說文云牛尾也高誘淮南注毳馬尾也周禮樂師  
注引鄭司農曰旄舞者毳牛之尾疏引山海經潘侯之  
山有獸如牛而節有毛其名曰旄牛注云今旄牛髀腳  
胡尾皆有長毛故先鄭據而言之案爾雅釋言毳屬也  
注毛毳所以爲屬舍人云毳毛屬也邊人續羊毛而作

漢書王莽傳以嫠裝衣師古曰毛之強曲者曰嫠後漢書岑彭傳足下生嫠注嫠長毛也

雜采目給

給者說文會五采繡也書益稷作會鄭曰會讀爲給謂畫也論語八佾篇給事後素皇侃疏給畫也畫之成文謂之爲給也文選射雉賦蘭綵注引小正曰雜采曰綵又江賦瑤珠怪石琤其表注引同案琤卽綵据此給當爲綵

雜言曰哢

哢者說文云哢異之言从口尤聲一曰雜語國語齊語雜處則其言哢注哢亂也文選長笛賦哢聒其前後者注哢聒雜聲也

廣義四

釋名云義宜也裁制事物使各宜也命名之故各隨其宜一名必有一義此篇與廣名廣

服廣物皆爾雅原釋所無亦云廣者廣義廣名推廣訓所未及服物二者爾雅以釋器賅之故此亦繫以廣從通例也度星後不云廣者爾雅所本無耳

凡無妻無夫通謂之寡

孟子梁惠王篇老而無妻曰鰥老而無夫曰寡案婦人無稱鰥之文其男子亦稱寡左襄二十七年傳齊崔杼生成及疆而寡是無妻亦謂寡也釋名寡蹠也蹠蹠單獨之言也墨子辭過篇內無拘女外無寡夫

寡夫曰莞寡婦曰嫠

莞者玉篇云單也無所依也古作僈方言僈特也通作嫠詩杖杜獨行嫠嫠又通嫠正月哀此嫠獨又通嫠閔予小子嫠嫠在疚皆孤獨之義故寡夫曰莞嫠者左襄二十五年傳嫠也何害注寡婦曰嫠通作釐詩巷伯傳鄰之釐婦釋文釐婦寡婦也

妾婦之賤者謂之屬婦屬逮也逮婦之名言其微也

書梓材至于屬婦釋文屬婦妾之事妻也正義曰以妾屬于人故名屬婦案說文媼婦人妊娠也周書曰至于媼婦許君所引是今文尚書與此異屬爲逮者禮記中庸所以逮賤也凡言逮者皆及於微賤之義也非分而得謂之幸

幸者禮記中庸行險以徼幸荀子富國篇朝無幸位注無德而祿謂之幸位

詰責以辭謂之讓

讓者說文云相責讓左昭二十五年傳益宮于邱氏且讓之注讓責也案今謙讓推讓皆假讓爲之說文手部攘推也漢書多从手作攘此詰責以辭當从言作讓上淫曰烝下淫曰報旁淫曰通

烝報通分釋之者左桓十六年傳衛宣公烝于夷姜正義曰烝訓爲進言自進與之淫也宣三年傳文公報鄭子之妃案漢律淫季父之妻曰報鄭子是文公叔父故以報名屬之其實君淫臣妻正所謂下淫也孔氏詩正義引左氏傳文姜如齊齊侯通焉服虔云傷淫曰通言傷者非其妻妾傷與之淫上下通名也墻有茨云公子頑通于君母左傳曰孔慍之母與其豎渾良夫通皆上淫也齊莊公通于崔杼之妻蔡景侯爲太子般娶于楚通焉皆下淫也以此知通者總名故服虔又云凡淫曰通是也

不直失節謂之慙慙愧也

慙者易下繫將叛者其辭慙正義曰將違叛已者貌雖相親辭不以實故其辭慙也周禮鄭注觀其顏色不直

則赧然疏云理曲顏色愧赧

面慙曰慙

慙當作赧音同說文赧面慙赤也方言秦晉之間凡愧而見上謂之赧孟子滕文公篇觀其色赧赧然注面赤心不正之貌

心慙曰慙

慙者方言僣慙慙也荆揚青齊之間曰僣若梁益秦晉之間言心內慙矣山之東西自愧曰慙案漢書司馬相如傳不亦慙乎服虔解慙爲慙通作忸書五子之歌顏厚有忸怩傳忸怩心慙

體慙曰逡

逡者爾雅釋言逡退也郭引外傳曰已復于事而逡今本齊語作有司已于事而逡韋注逡退伏也文選注引

爾雅逡作踰郭注云逡巡卻去也今注無此句案人慙則退縮畏避卻去不前故謂之逡也

廣名五

釋名云名明也名實使分明也管子心術篇名者聖人之所以紀萬物也顏氏家訓古者名以正體案物必有名義各有取此篇於疾喪坵墓之事援引最詳

諱死謂之大行

漢書霍光傳注引韋昭曰大行者不反之辭也天子崩未有諡故稱大行也案諱死者不敢斥言死故諱之稱大行若陟方登假矣

死而復生謂之蘇蘇寤也

近本無蘇寤也三字一切經音義卷廿五引死而復生謂之蘇

蘇寤也今据補

左宣八年傳晉人獲秦謀殺諸絳市六日而蘇又定四年傳由于徐蘇而從是死而復生也案凡物振動亦曰蘇禮記樂記蟄蟲昭蘇注更息曰蘇正義曰言蟄蟲之



類皆埋藏其體近於死今復得活似死而更息也又月光盡而更生亦爲蘇釋文朔蘇也月死復蘇生也蘇爲寤者楚辭橘頌蘇世獨立注蘇寤也案蘇古作穌書后來其蘇釋文本作穌

疾甚謂之𦵏

案說文云𦵏壁危也漢書文帝紀或𦵏于死亡如瀉以爲近邊欲墮之意故借爲疾甚之稱

請天子命曰未可以戚先王請諸侯命曰未可以近先君請大夫命曰未可以從先子

請天子命言爲天子所永命也書金縢周公曰未可以戚我先王某氏傳戚近也言未可以死近我先王正義曰死則神與先王相近故言近先王案諸侯大夫今經傳無明文義亦同也

空棺謂之櫬

櫬者左僖六年傳士輿櫬又襄二年傳穆姜自爲櫬皆謂空棺案禮記檀弓君卽位而爲棨卽櫬也

有屍謂之柩

屍尸同禮記曲禮在牀曰尸在棺曰柩釋名尸已在棺曰柩

饋死者謂之賵

賵者禮記少儀賵馬入廟門注以其主于死者正美以馬送死曰賵賵副亡者之意也公羊隱元年傳喪事有賵賵者蓋以馬以乘馬束帛車馬曰賵貨財曰賵衣被曰襚注賵猶覆也賵猶助也皆助牛送死之禮穀梁隱三年傳歸死者曰賵歸生者曰賵案說文無賵字當作冒

衣服謂之襚

襚者禮記檀弓不釋服而往遂以襚之少儀敵者曰襚正義曰襚者以衣送死人之稱禮以衣送敵者死曰襚襚者遂彼生時之意也左定九年傳公三襚之注襚衣也穀梁隱元年傳衣衾曰襚疏襚者衣服之名故送死之衣亦名襚也

埋柩謂之殯

殯說文云瘞也釋名假葬于道側曰殯殯翳也案與殯同士喪禮掘殯見衽注殯埋棺之坎也掘之于西階上呂氏春秋先識覽威公薨殯九月不得葬周乃分爲二注下棺置地中謂之殯

殯坎謂之池

殯坎謂池不見經傳案禮記檀弓主人既祖填池鄭注

塋池當爲奠徹聲之誤也此塋池讀如字與鄭義異釋文塋池盧王並如字讀

塋謂之窆

窆說文云穿地也周禮小宗伯卜葬兆甫窆亦如之鄭大夫讀窆爲穿杜子春讀窆爲冢皆謂葬穿塋也

下棺謂之窆

窆者說文云葬下棺也周禮遂人及窆陳役鄭司農曰窆謂下棺時儀禮既夕乃窆注窆下棺也禮記謂之封春秋傳謂之塋皆葬下棺也音相似

塋窆謂之封

封者易下繫不封不樹正義曰不積土爲塋是不封也禮記檀弓於是封之崇四尺注聚土曰封

宰冢也

宰者公羊僖三十三年傳宰上之木拱矣注宰豕也列子天瑞篇望其墳宰如也釋文宰如言如豕也

壝塋也

壝者方言云冢秦晉之間或謂之壝注有界埒似耕壟因名之禮記曲禮適墓不登壝注謂其不敬壝冢也墓塋域

無主之鬼謂之殤

男女未冠笄而死者謂之殤在外死者亦謂之殤殤之言傷也楚辭有國殤篇案無主之鬼猶言無後也禮記宗子爲殤而死庶子弗爲後也殤無爲人父之道故絕無後爲之祭主是爲無主之鬼又案周禮太祝注引鄭司農云如今祭殤無所主命蓋以主命爲神主之主祭殤禮略無所主命亦無王之義

廣服六

唐明皇孝經注服者身之衣也洪範五行傳

鄭以緇紵釋之大人服物則以爲元種緇結案服者衣裳之總名彰施古今異宜名謂亦隨時改易此篇所釋兼及用器皆所以推廣張名也

治絲曰織織繪也

說文云織作布帛之總名專屬之治絲者鄭氏云凡爲織者先染其絲乃織之詩瞻卬休其蠶織箋訓織紵又禮記內則織紵組紃知織爲治絲也織又爲繪者王漢士不衣織注織染絲織之正義曰織者前染絲後織之此服功多色重故士不得衣之也據此織與繪爲二物書禹貢織貝傳織細紵史記集解引織細繪也故知織爲繪也

麻紵葛曰布布通名也

麻一名枲禹貢岱畎絲枲正義曰枲麻也禮記雜記有

司麻衣注麻衣白布深衣孔安國論語麻冕注古者績麻三十升布以爲之紵麻屬陸璣詩疏紵亦麻也荆揚之間謂之徽紵今南越紵布皆用此麻葛說文云絺紵草也范甯穀梁注葛或作褐釋文毛布也布爲通名者釋名布布也布列衆縷爲經以緯橫成之也

績縣也

績謂縣者禹貢厥篚織績傳績細絲禮記玉藻績爲繡注績謂今之新縣也左宣十二年傳皆如挾績注績縣也

絮之細者曰績

說文云絮敝綿也又績絮也急就篇注漬繭擘之精者曰縣粗者曰絮案上文云績縣也知縣績一物縣之精者爲絮故絮之細者曰績也

縉之精者曰縉

廣雅縉細縉也書禹貢厥篚元纁縉傳縉白縉淮南兵略訓雖有縉之幘注縉細縉也顏師古漢書食貨志注縉皓素也縉之精白者也

縉之麤者曰素

漢書地理志注縉鮮支也卽今所謂素者也案說文云素白緻縉也釋名素樸素也已織則供用不復加巧飾也

葛之精者曰絺麤者曰絺

說文云絺細葛也又絺麤葛也曲禮爲天子削瓜者副之中以絺爲國君者華之中以絺玉藻浴用二巾上絺下絺皆絺精而絺麤也

在首謂之元服



在首謂之元服者元訓首左僖二十三年傳狄人歸其元注元首儀禮士冠禮令月吉日始加元服大戴禮公冠篇始加昭明元服

弁髦太古布冠冠而敝之可也

弁髦者左昭九年傳豈如弁髦而因以敝之注童子垂髦始冠必三加冠成禮而棄其始冠故言弁髦因以敝之正義曰凡加冠之禮先用緇布之冠斂括垂髦三加之後去緇布之冠不復更用故曰因以敝之禮記玉藻太古冠布其緌也孔子曰吾未之前聞也冠而敝之可也鄭引雜記太白緇布之冠不緌云太白卽太古白布冠又云此重古而冠之耳正義冠而敝之可也者言緇布之冠初加暫用冠之罷冠則敝棄之可也賈公彥士冠禮疏云冠而敝之可也者據士以上冠時用之冠說

則做之不復著也若庶人猶著之故詩云彼都人士臺笠緇撮是用緇布冠籠其髮是庶人常服之矣

題頭也

題者詩清人箋矛衿近上及室題釋文題頭也文選注引呂覽棺題曰和呂覽舊本題作頭

顛顏顛額也

顛頂也見爾雅此釋爲額者詩車鄰有馬白顛傳白顛的顛也通作顛爾雅釋言顛題也注題額也顏者詩君子偕老揚且之顏也傳謂額角豐滿漢書溝洫志自徵引洛水至商顏下師古曰謂之顏者譬人之顏額也素問刺熱篇心熱病者顏先赤注顏額也顛者爾雅釋畜面顛皆白惟駢注顛額孟子滕文公篇其顛有泚又告子篇可使過顛趙注皆訓額

璽謂之印

璽說文作璽从土云王者印也所以主土从土爾聲重  
文璽籀文从玉案月令固封疆呂覽作固封璽此从土  
之義周禮司市以璽節出入之注璽節印章如今斗檢  
封矣疏案漢法斗檢封其形方土有封檢其內有書則  
周時印章上書其物識事而已蔡邕獨斷云璽者印也  
印者信也天子璽以白玉螭虎紐古者尊卑共之月令  
曰固封璽春秋左氏傳曰魯襄公在楚季武子使公冶  
問璽書追而與之此諸侯大夫印稱璽者也衛宏曰秦  
以前民皆以金玉爲印龍虎紐惟其所好然則秦以來  
天子獨以印稱璽又獨以玉羣臣莫敢用世本曰魯昭  
公始作璽

紱謂之綬

說文無紱字當作紼顏師古漢書注紼繫印之組通作  
鞞漢書諸侯王表奉上璽鞞注鞞璽之組也又通鞞後  
漢書班固傳注引蒼頡曰鞞殺也案急就篇注殺受也  
所以承受印環也知紱殺一物

褱褱謂之童容

方言云褱褱江淮南楚謂之褱褱自關而西謂之褱褱  
其短者謂之短褱廣雅褱褱褱褱也褱容卽童容从衣  
者俗字釋名荊州謂褱衣曰布褱亦曰褱褱言其褱褱  
宏裕也案鄭氏詩箋帷裳童容也疏引先鄭云容謂褱  
車山東謂之裳韋或曰童容以帷障車之旁如裳以爲  
容飾故或謂之帷裳或謂之童容其上有蓋四傍垂而  
下謂之褱是古褱車亦有名童容者周禮巾車重翟厭  
翟安車皆有容指此也

布褐而紩之謂之藍縷

說文云紩縫也方言云以布而無緣敝而紩之謂之襤縷自關而西謂之襦袖其敝者謂之敝又云無緣之衣謂之襤又云紩衣謂之縷左宣十二年傳箠路藍縷注藍縷敝衣正義引服虔曰言其縷破藍藍然案方言以無緣之衣爲襤縷此但言布褐而紩之其無緣可知褐詩七月箋毛布也後漢書陳元傳注織毛爲布賤者之服也

袴謂之褰

釋名袴跨也兩股各跨別也方言云袴齊魯之間謂之褌或謂之褌關西謂之袴說文褰袴也引春秋傳徵褰與褌案左傳注褰袴正義曰內則云童子不衣褌袴是衣有袴也以可褰行故以褰爲袴

蔽膝謂之裋

蔽膝卽玉藻組鞅幽衡之鞅釋名鞅鞅也鞅蔽膝也所以蔽膝前也婦人蔽膝亦如之又曰晚褕晚時褕褕然張也方言云蔽邾江淮之間或謂之褕或謂之紱魏宋南楚之間謂之大巾自關東西謂之蔽邾齊魯之間謂之裋案裋說文作褕禮記雜記繭衣裳與稅衣纁裋爲裋釋文裳下褕也王肅曰婦人蔽膝也爾雅釋器衣蔽前謂之褕李巡曰衣蔽前衣蔽膝也郭璞曰今之蔽膝帶之垂者謂之厲

廣雅釋器厲帶也詩都人士垂帶而厲傳厲帶之垂者左桓二年傳鞶厲游纓服虔云厲是大帶之垂者杜注同

大巾謂之冪

幕說文作𦇧云覆也周禮幕人注以巾覆物曰幕儀禮大射儀幕用錫若絺注幕覆尊巾也亦作𦇧禮記禮器疏布鼎注鼎或作幕正義曰幕覆也謂郊天時以麤布爲巾以覆尊也

覆帳謂之幄幄幕也

爾雅釋器幬謂之帳注今江東亦謂帳爲幬覆帳謂幄者釋名幄屋也以帛衣板施形如屋也鄭氏幕人注四合象宮室曰幄王所居之帳也掌次朝日祀五帝則張大次小次注次謂幄也又張尸次注尸則有幄鄭司農曰尸次祭祀之尸所居更衣帳左襄二十四年傳二子在幄注幄帳也知帳幄名異實同幄又爲幕者左昭十三年傳子產以幄幕九張行注幄幕軍旅之帳又哀八年傳三踊于幕庭注于帳前設格令士試躍之淮南記

論訓燕雀處帷幄注幄幕也

簀牀第也

爾雅釋器簀謂之第注牀版禮記檀弓大夫之簀與注  
簀謂牀第也儀禮士喪禮牀第注第簀也方言牀齊魯  
之間謂之簀陳楚之間或謂之第案簀第一聲之轉  
大扇謂之翼

周禮巾車有翼注所以禦風塵故書翼爲駢杜子春云  
當爲翼書亦或爲旣賈疏翼卽扇也儀禮既夕燕器械  
筮翼注翼扇禮記檀弓置翼注翼以木衣布如礪與孔  
疏礪漢時之扇案古以翼爲燕居之器又爲樂器明堂  
位周之璧翼是呂覽僂翼以督之則又爲棺飾後世乃  
有筴扇說文筴扇也重文筴但从妾無義當是从翼省  
呂覽別類篇冬不用翼注翼扇也



杖謂之挺

孟子梁惠王篇殺人以挺與刃注挺杖也呂覽簡選篇  
鋤耒白挺注挺杖也

鍵謂之籥

案周禮司門掌授管鍵以啓閉國門先鄭曰鍵讀爲塞  
管謂籥也鍵謂牡也似別鍵與籥爲二物禮記月令慎  
管籥注管籥搏鍵器也正義曰以鐵器爲之似樂器之  
管籥指於鎖內以搏取其鍵也胡三省通鑑注管鍵也  
鑰關牡也今謂之鎖匙皆以鍵與籥爲二此云鍵謂之  
籥者方言戶鑰自關而東陳楚之間謂之鍵自關而西  
謂之鑰禮記檀弓注管鍵也釋文鍵籥也案籥當作關  
籥乃關之段借字後世更以金爲之別作鑰

綦局謂之弈

說文云弈圍碁也方言所以行碁謂之局或謂之曲道博物志堯造圍碁以教子丹朱或曰舜以子商均愚故作圍碁以教之後漢書張衡傳弈秋以碁局取譽注弈圍局也

在足謂之履履尊者曰達履謂之金舄而金紉也

履說文云足所依也釋名履禮也飾足所以爲禮也達履者詩車攻赤芾金舄傳舄達履也箋云金舄黃朱色也正義曰傳言金舄達履者天官履人注云舄有三等金舄爲上冕服之舄下有白舄黑舄此云金舄者卽禮之赤舄也故箋云金舄黃朱色加金爲飾故謂之金舄白舄黑舄猶有在其上者爲尊未達其赤舄則所尊莫是過故云達履言是履之最上達者也此舄也而曰履履通名案履履皆是通語金舄而金紉者禮記玉藻童

子未裘不帛不屨絢注絢屨頭飾也士冠禮黑屨青絢  
纔純注絢之言拘也以爲行戒狀如刀衣鼻在屨頭其  
仁案絢屨頭飾古人重之以爲成人之飾金舄之飾直  
達於絢蓋舄絢同色所以同其制而獨得達名也雖不  
從詩疏義亦可備達履之一解

小爾雅疏證卷四

嘉定葛其仁學

廣器七

易繫辭傳以制器者尚其象又云形乃謂之器又云立成器以為天下則說文器皿也象

器之口大所以守之爾雅有擇器篇此更加廣耳篇中先及弓矢等為禦武之器次及舟車等為行遠之器器不忽于小故詳舉繩索繫結之細器必綜其大故遠及原地池澤之繁皆補爾雅所不備

射有張皮謂之侯侯中者謂之鵠鵠中者謂之正正方二

尺

張皮舊作張布據詩小雅正義王肅引改正

周禮司裘王大射則其虎侯熊侯豹侯設其鵠諸侯則其熊侯豹侯卿大夫則其麋侯皆設其鵠注侯者其所射也以虎熊豹麋之皮飾其側又方制之以為臺謂之鵠著於侯中所謂皮侯鄭司農云鵠鵠毛也方十尺曰侯四尺曰鵠二尺曰正元謂侯中之大小取數於侯道鄉射記曰弓二寸以為侯中則九十弓者侯中廣丈八

尺七十弓者侯中廣丈四尺五十弓者侯中廣一丈尊卑異等此數明矣考工記曰梓人爲侯廣與崇方參分其廣而鵠居一焉然則侯中丈八尺者鵠方六尺侯中丈四尺者鵠方四尺六寸太半寸侯中一丈者鵠方三尺三寸少半寸謂之鵠者取名于鵠鵠鵠小鳥而難中是以中之爲鵠亦取鵠之言較較者直也射所以直己志案詩賓筵正義引鄭衆馬融周禮注皆云十尺曰侯四尺曰鵠二尺曰正與此合後鄭不從故射人注曰今儒家云四尺曰鵠二尺曰正鵠乃用皮其大如正此說失之矣賈疏賓射射正大射射鵠儒家以正鵠爲一解故鄭破之案毛公鄭衆馬融王肅俱云二尺曰正語必有所受不必泥後鄭之說

正中者謂之鵠鵠方六寸

檠與臬同說文云臬射準的也又土部塹字解云射臬也是檠又謂之塹正中謂之檠者詩行葦傳已均中莛箋云莛質也正義曰莛是質卽所射之物正鵠之總名又云檠方六寸者周禮司裘注引先鄭云四寸曰質賈疏質卽詩云發彼有的及鵠皆是一物其鵠不止四寸而已案王肅以六寸之說爲是

棘戟也

棘爲戟者詩斯干如矢斯棘箋云棘戟也如人挾弓矢戟其肘周禮掌舍爲壇墠宮棘門注引鄭司農云棘門以戟爲門賈疏知棘是戟者見左氏隱十一年鄭欲伐許授兵于太宮子都與穎考叔爭車子都拔棘以逐之故知棘卽戟也禮記明堂位越棘注棘戟也引春秋傳子都拔棘

鉞鉞斧也

鉞者左昭十二年傳剝圭以爲鉞秘注鉞斧也亦作戚  
詩公劉干戈戚揚傳戚斧也禮記文王世子大樂正學  
舞千戚注戚斧也鉞依字當作戍說文戍斧也書牧誓  
左杖黃鉞傳鉞以黃金飾斧正義曰太公六韜云大柯  
斧重八斤一名天鉞

干𦘔盾也

干者詩公劉箋干盾也周禮司干注干舞者所持謂楯  
也𦘔者逸周書王會解鮫𦘔注𦘔盾也以鮫皮作之通  
作伐詩小戎蒙伐有苑玉篇作蒙𦘔釋文伐本或作𦘔  
案方言盾自闕而東或謂之𦘔或謂之干關西謂之盾  
戈句予戟也

戈釋名云今句予戟也或謂之鐃鳴或謂之鐃頸周禮

司戈盾注戈今時句子戟賈疏冬官冶氏爲戈戟戈則兩刃長六尺六寸戟則三刃長丈六尺鄭爲一物解之者舉漢法以況之漢時見戈有刃出者爲句子亦名胡子故號戈爲句子戟也禮記文王世子春夏學干戈注戈句子戟也正義曰夏氣茂盛萬物體壯枝葉似戟有句子也

刃之削謂之室室謂之鞞鞞鞞之飾也

刃削謂之室者釋名刀其室曰削削削也其形削殺裏刀體也方言劍削自河而北燕趙之間謂之室自關而東或謂之廓或謂之削自關而西謂之鞞案鞞卽鞞漢書貨殖傳質氏以酒削而鼎食師古曰削謂刀劍室也室又謂之鞞者說文削鞞也逸周書王會解魚支之鞞注鞞刀鞘鞞俱爲鞞飾者左桓二年傳藻鞞鞞鞞注



裨佩刀削上飾鞞下飾案詩瞻彼洛矣篤公劉毛傳皆以琫爲上飾琕爲下飾

矢服謂之發

發經傳俱訓弓衣案發鞞古今字詩彤弓傳訓櫜爲鞞晉語右屬櫜鞬注櫜矢房是弓矢衣俱可云發也

小船謂之艇

船說文云舟也小船謂之艇者方言南楚江湘凡船大者謂之舸小舸謂之艇艇謂之舨舨縮小舨縮謂之艇釋名船二百斛以下曰艇淮南俶真訓越舨蜀艇注艇一版之舟

艇之小者曰舨

艇小謂之舨者方言艇長而薄者謂之舨短而深者謂之舨郭注今江東呼艇舨者案字當作泝說文泝編木

以渡也

船頭謂之舳尾謂之艫

說文云舳舻也漢律名船方長爲舳舻一曰舟尾又云舳舻舳也一曰船頭案此以船頭爲舳尾爲舻者舳舻亦爲船頭尾之通稱文選吳都賦宏舸連舳巨艦接舻劉淵林注舳船前也舻船後也玉篇舻在船後廣韻亦云舻舟後

楫謂之橈

釋名在旁撥水曰櫂又謂之楫楫捷也撥水使舟捷疾也釋爲橈者方言楫謂之橈亦謂之櫂蓋楫橈櫂一物而三名後漢書岑彭傳冒突露橈數千艘注橈小楫也楚辭湘君蓀橈兮蘭旌注橈船小楫也楫通作輯漢書劉屈氂傳又發輯濯士師古曰短曰輯長曰濯輯本從

木其音同耳濯本亦作權

車轅上者謂之轅

案方言車轄齊謂之轅史記田單傳盡斷其軸末而傳鐵籠籠與轅通車軸末之名云轅上者謂之轅未詳其義

轅謂之輶

輶謂輶者方言輶楚衛之間謂之輶考工記輶人爲輶注輶車輶也左隱十一年傳挾輶以走注同公羊僖元年傳抗輶經而死注輶小車輶冀州以此名之云爾軫謂之枕

軫說文車後橫木也謂之枕者釋名軫枕也軫橫在前如臥牀之有枕也考工記車軫四尺注軫輿後橫木疏卽今之車枕

較謂之幹

釋名較在箱上爲辜較也考工記輿人以其隧之半爲之較崇注較兩齣上出式者疏較謂車輿兩箱今人謂之平昂也言兩較謂車箱兩旁豎之者二者既別而云較兩齣上出式者以其較之兩頭皆置於齣上二木相附故據兩較出式而言之案凡物在兩旁者皆謂之幹人兩脅謂之幹又井闌謂之幹皆其義也

衡扼也

考工記轡人衡任者五分其長注衡任謂兩軛之間也論語衛靈公篇在輿則見其倚於衡也包咸曰衡軛也在輿則若繫車軛案軛扼通

扼上者謂之烏啄

釋名榻扼也所以扼牛頸也馬曰烏啄下向又云馬頸

似鳥開口向下啄物時也案衡扼之規又作厄詩韓奕  
倬革金厄傳厄鳥喝也喝啄通

累纆緇也

繫說文云大索也通作羸易大壯九三羸其角馬融曰  
羸大索也案王肅作縲鄭虞作羸蜀才作累張璠作縲  
纆者說文云纆汲井纆也方言緇自關而東周洛韓魏  
之間謂之纆或謂之絡關西謂之緇

緇索也

緇卽詩宵爾索綯之綯綯與緇字異義同廣雅綯索也  
大者謂之索小者謂之繩

說文云索草有莖葉可作繩索又云繩索也案繩索本  
一物此云大謂索小謂繩者禮記緇衣王言如綸其出  
如綽注綽引棺索也正義引張華云綸如宛轉繩知索

大於繩也

誦而戾之爲紆

紆或作結儀禮士喪禮不結注結讀爲紆屈也江河之間謂縈收繩索爲紆禮記玉藻齊則結結佩注結屈也結又屈之

繆而紆之爲縲

縲者論語公冶長篇雖在縲縲之中孔注縲攣也亦作繼左傳二十四年傳臣召羈繼服注犬縲曰繼杜曰繼馬縲案儀禮喪服傳不繆垂注不紆其帶之垂者說文紆轉也淮南本經訓以相繆紆注繆紆相纏結也

垆地也

垆爲地者爾雅釋地林外謂之垆詩明云在垆之野傳垆遠野也

墉牆謂之陴

爾雅釋宮墉謂之牆是墉牆同義謂之陴者說文云陴城上女牆俾倪也釋名城上垣曰陴晚言于孔中陴晚非常也亦曰陴陴裨也言裨補城之高也亦曰女牆言其卑小比之于城如女子之于丈夫也左宣十二年傳守陴者皆哭注陴城上僻倪

高平謂之太原

案鄭氏周禮注高平曰原春秋昭公元年晉荀吳帥師敗狄于太原公羊傳上平曰原酈道元水經注引春秋說題辭高平曰太原原端也平而有度

汪池也

汪爲池者左桓十五年傳尸諸周氏之汪注汪池也又僖三十三年傳覆于周氏之汪注車傾覆池水中案說

文汪深廣也

水之北謂之汭

水北謂汭者書禹貢涇屬渭汭傳水北曰汭通作芮詩  
篤公劉芮鞠之卽箋云芮之言內也釋文芮本又作汭  
澤之廣謂之衍

釋名下而有水曰澤澤之廣謂衍者周禮大司徒注下  
平日衍淮南墜形訓澤氣多仁注下而汙者曰衍

廣物入

說文云物萬物也虞翻易通象乾爲物擊辭傳坤作成物乾坤爲大父母萬物所歸滋長

故曰造物案鄭氏樂記注物謂殖生者也趙岐孟子注物謂比物可以養人者也故此篇所釋祇及食物而於穀禾詳言之重本也

藁謂之稈

說文藁稈也稈禾莖也禮記禮器藁鞣之設注藁鞣除  
穗粒取稈藁爲郊席漢書翼奉傳已奉穀租又出藁稅



師古曰藁禾稈也通作秆左昭二十七年傳或取一秉秆焉注秆藁也說文引或投一秉稈焉

稈謂之芻

禮記祭統士執芻注芻謂藁也案藁芻同物故稈卽謂之芻

生日生芻

舊本無生芻二字生日連下穀謂之粒爲句今從一切經音義十七引增入

詩白駒生芻一束釋文生芻謂青藁也

穀謂之粒

孟子滕文公篇樂歲粒米狼戾注粒米粟米之粒也案粒通作立詩思文立我烝民傳立當作粒正義曰粒米也

菜謂之蔬

爾雅釋天蔬不熟爲饌注凡草菜可食者通名爲蔬木

作疏逸周書大匡解無播疏注可食之菜曰疏淮南主術訓秋畜蔬食注菜蔬曰疏莊子山木篇猶且習蔬於江湖之上下釋文引司馬彪注云疏菜也

禾穗謂之穎

說文穎禾末也詩生民實穎實粟傳穎垂穎也正義曰實穗重而垂穎穎是禾穗之挺言其穗重而穎垂也

截穎謂之銍

釋名銍穫禾鐵也銍銍斷禾聲也書禹貢二百里納銍鄭注銍謂刈穗斷去稾也詩臣工奄觀銍艾傳銍穫也釋文銍器可以穫禾故云銍穫也案刈禾謂之穫周頌穫之捭捭傳捭捭穫聲也爾雅捭捭穫也注刈禾聲說文銍穫禾短鎌捭穫禾聲本兩字今皆作銍假借爲之拔心曰捭拔根曰擻

方言掘擢拔也白關而西或曰拔或曰擢東齊海岱之間曰掘郭璞注今呼拔草心曰掘孟子公孫丑篇宋人有閔其苗之不長而掘之者注掘挺拔之莊子駢拇篇崔德塞性注拔去自然之德文選注引倉頡篇掘抽也把謂之秉

說文秉禾束也从又持禾詩大田彼有遺秉傳秉把也左傳一秉稗注亦云秉把也

秉四日筥

儀禮聘禮記四秉日筥注此秉謂刈禾盈手之秉也筥稭名也若今萊陽之間刈稻聚把有名爲筥者

筥十日稷

稷當爲稷熊忠古今韻會筥字下引小爾雅作稷儀禮聘禮記十筥日稷注一車之禾三秬爲千二百秉三百

筥三十稷也案此禾彙之數與廣量篇不同說文耗下云周禮二百四十斗爲秉四秉曰筥十筥曰稷十稷曰耗誤以禾束之秉爲量名之秉又以車米秉有五數之數爲一秉之數則所謂一車三耗當有二萬八千八百斛之多必不然矣此條與周禮儀禮鄭注皆合

### 棘實謂之棗

說文棘小棗叢生者从竝束棗羊棗也从重束詩園有棘傳棘棗也孟子告子篇養其槭棘注槭棘小棘所謂酸棗也淮南兵畧訓伐棘棗注棘棗酸棗楚辭愍命樹枳棘注小棗爲棘

### 桑之實謂之甚

詩氓無食桑甚釋文甚本又作椹桑實也泮水食我桑黠傳黠桑實也釋文曰說文字林皆作甚案說文黠桑

甚之黑也甚黹本兩收爾雅釋木桑辨有甚梔舍人曰桑樹一半有甚半無甚爲梔

杵之實謂之椽

周禮大司徒注引鄭司農云阜物杵栗之屬今世間謂杵實爲阜斗疏杵實之皮得染阜又掌染草注染草藍蒨象斗之屬釋文象或作椽詩絲杵械拔矣箋杵櫟也案爾雅釋木櫟其實林孫炎注櫟實椽也又杵杼郭注杵樹也詩集于苞杵陸機疏今杵櫟也說文杵柔也其實阜一曰樣柔杵也讀若杼莊子狙公賦芋司馬云芋椽子也芋卽柔樣卽椽古今字

廣鳥九

說文鳥長尾禽總名也左氏傳少皞摯之立也鳳鳥適至故紀于鳥爲鳥師而鳥名此篇

所釋詳及鳥類取其孝鳥

去陰就陽者謂之陽鳥鴻雁是也

謂之陽鳥者此鳥感陽氣而生性惡陰喜陽人謂之陽鳥也書禹貢陽鳥攸居鄭注鴻雁之屬隨陽氣南北聘記昏義鄭注雁是隨陽之鳥妻從夫之義也

純黑而反哺者謂之烏

謂之烏者詩北風莫黑匪烏陸佃埤雅引林罕說烏全象鳥形但不注其目睛萬類目睛皆黑烏體全黑遠而不分別其睛也說文烏孝鳥也象形春秋運斗樞曰烏爲暢陽氣仁故反哺文選典引注引蔡邕云烏反哺之鳥至孝之應也

小而腹下白不反哺者謂之雅烏

雅說文云楚烏也秦謂之雅郭璞爾雅注小而多羣腹下白江東亦呼爲鶻烏水經注引馬融說以爲賈烏雅賈聲相近

白項而羣飛者謂之燕鳥燕鳥白脰鳥也

證以白脰者爾雅燕白脰鳥注脰頸

雅鳥鶯也

雅鳥爲鶯者說文雅一名鶯一名卑居爾雅釋鳥鶯斯卑居注鴝鳥也詩小弁弁彼鶯斯傳鶯卑居卑居雅鳥也

廣獸十爾雅四足而毛謂之獸獸者守也言其力多不易可擒先須圍守然後乃獲此于豕之種類詳舉之魚摺又推類而言

豕彘也彘豬也

三者皆通名方言豬北燕朝鮮之間謂之豨關東西或謂之彘或謂之豕說文云豕彘也竭其尾故謂之豕又云彘豕也豕後蹄廢謂之彘又云豬豕而三毛叢居者其子曰豚

從之包咸注論語鄭康成注禮及尙書王逸注楚辭高誘注呂覽皆以仞爲七尺應劭漢書食貨志注以爲五尺六寸此云四尺爲仞惟王肅從此說見考工記匠人疏案人伸兩臂以度爲尋尋爲八尺但伸一臂則謂之仞仞四尺也

倍仞謂之尋

考工記廬人及長尋有四尺注八尺曰尋賈疏人長八尺而及長尋有四尺崇于人四尺則八尺之外惟有四尺在是尋長八尺可知又儀禮鄉射禮記八尺曰尋爾雅釋天緇廣充幅長尋曰旒注帛全幅廣八尺

尋舒兩肱也

尋說文作尋云伸臂一尋八尺考工記匠人宮中度以尋疏宮中合院之內無几無筵故用手之尋也大戴禮



主言篇舒肘知尋

倍尋謂之常

釋名車戔曰常丈六尺車上所持也入尺曰尋倍尋曰常故稱常也考工記廬人車戔常注倍尋曰常疏及長丈二而云車戔崇于戔四尺則丈二之外有四尺總丈六尺是倍尋曰常也儀禮公食大夫禮注丈六尺曰常半常曰尋

五尺謂之墨

國語周語不過墨丈尋常之間注五尺爲墨

倍墨謂之丈

說文云丈十尺也从又持十禮記曲禮席間函丈正義曰席之制三尺三寸三分寸之一則三席是一丈漢書律厯志十尺爲丈丈者張也

倍丈謂之端倍端謂之兩

周禮媒氏純帛無過五兩注五兩十端也雜記曰納幣一束束五兩兩五尋然則每端二丈案杜預左傳注亦以二丈爲一端二端爲一兩

倍兩謂之匹

說文云匹四丈也漢書食貨志布帛廣尺二寸爲幅長四丈爲匹淮南天文訓音之數五以五乘八于八四十故四丈而爲匹案此云倍兩則爲八丈疑倍字衍

匹有謂之束

御覽八百三十引作匹有五謂之束以意繹之匹當是兩之誤有字或卽五字之誤禮記雜記納幣一束束五兩兩五尋注十箇爲束貴成數兩兩者合其卷是謂五兩八尺曰尋五兩五尋則每卷二丈也合之則四十丈

今謂之匹猶匹偶之匹與儀禮士冠禮公食大夫禮皆以束帛爲十端賈疏凡言束者無論脯與錦皆以十爲數也

量十二

考工記桌氏爲量鄭曰量豆區鬴也漢書律厤志量者侖合升斗斛也所以量多少也茲

篇所釋皆經傳習見考求量名者有所取證焉

手之盛謂之溢

舊注滿一手也禮記喪大記朝一溢米莫一溢米注二十兩曰溢於粟米之法一溢爲米一升二十四分升之一案儀禮喪服傳釋文引王肅劉達袁準孔倫葛洪皆云滿手曰溢與此合不同鄭義考古量二斗七升當今五升四合溢爲米一升二十四分升之一不過當今二合稍贏一手所盛理或然也

兩手謂之掬

本紀錡作率又平準書有白世漢書蕭望之傳有金選  
並卽錡字尙書大傳死罪罰二千銀又云一銀六兩鄭  
云死臯出三百七十五斤此明用六兩爲銀之說鄭尙  
書注已匹或呂刑注亦以六兩爲銀與王肅同也  
二銀四兩謂之斤

漢志斤者明也三百八十四銖易二篇之爻陰陽變動  
之象也十六兩成斤者四時四方之象也淮南天文訓  
天有四時以成一歲因而四之四四十六故十六兩而  
爲一斤

斤十謂之衡

未詳

衡有半謂之秤

秤當爲稱說文云稱銓也从禾再聲春分而禾生日夏

至晷景可度禾有秒秋分而秒定律數十二秒而當一分十分而寸其以爲重十二粟爲一分十二分爲一銖故諸程品皆从禾案衡有半謂稱未詳

秤二謂之鈞

說文云鈞三十斤也孟子梁惠王篇吾力足以舉百鈞注三千斤也史記貨殖傳銅器千鈞徐廣曰三十斤漢志鈞者均也陽施其氣陰化其物皆得其成就平均也權與物均重萬一千五百二十銖當萬物之象也四百八十兩者六旬行八節之象也三十斤成鈞者一月之象也淮南子三月而爲一時三十日爲一月故三十斤爲一鈞

鈞四謂之石


石說文作秝云百二十斤也鄭氏月令注百二十斤曰

石漢志石者大也權之大者也四鈞爲石者四時之象也重百二十斤者十二月之象也淮南子四時而爲一歲故四鈞爲一石

石四謂之鼓

管子地數篇民自有百鼓之粟者不行注穀十二斛也與此不同案斗石之石容四十斤十二石則四百八十八斤鈞石之石重百二十斤四石亦四百八十斤左昭二十九年傳遂賦晉國一鼓鐵服虔以鼓爲量名案鐵不以量計當從此義爲合

小爾雅疏證卷四終



小爾雅逸文疏證卷五

太倉王寶仁校輯

嘉定葛其仁補證

固亦故也

一切經音義廿四引

案禮記哀公問固民是盡注固猶故也儀禮士昏禮記敢固以請注固如故論語固天縱之將聖論衡作故史記魯世家咨於固實徐廣曰固一作故

分次也

文選魯靈光殿賦注引

案班次也見廣詁說文班分瑞玉國語班先王之分物注班分也班可訓次故分亦訓次

碩遠也

一切經音義三引

案經傳皆訓碩爲大此言遠者詩閟宮正義大者廣遠之言義得相承也



迂犯也文選運命論注引

案禮記哀公問午其衆王肅作迂訓爲違文選幽通賦

上聖迂而後拔兮曹注迂觸也皆與犯義相近

暴乾也一切經音義廿二引

案暴曬也見廣言暴又爲乾者荀子勸學篇雖有枯暴

注暴乾

廣橫也一切經音義二引

案廣遠也見廣言又爲橫者說文東西曰廣周髀算經

注橫者謂之廣廣古通光堯典光被四表漢書王莽傳

後漢書馮異傳皆曰橫被四表

禦抗也禦當也一切經音義廿四引

案抗禦也見廣言轉相訓禦又爲當者易漸卦利用禦

寇詩黃鳥百夫之禦虞注毛傳皆訓爲當

區域也

後漢書方術傳注引

案說文區踣區臧隱也从品在口中區之義內臧多品故引申爲區域

盥澡也洒也

莊子寓言篇釋文引

案說文盥澡手也又澡洒手也古人每旦必洒手洒面則不必旦旦爲之古之盥手者用匭澆手水下流于洗盥者揮手令乾而已

羌發聲也

文選注卷二引

案離騷羌內恕己以量人兮注羌楚人語辭也後漢書馮衍傳羌前人之所有注羌語發聲也

祭山川曰祈沈

考工記釋文引

案山海經南山經自天廬之山以至南禺之山其祠皆一白狗祈又中山經自景山至琴鼓之山其祠用一雄

雞祈瘞郭璞曰祈瘞禱請已埋之也爾雅釋天祭山曰  
廐縣孫炎曰埋于山足曰廐埋于山上曰縣是祭山爲  
祈也祈通作幾周禮肆師及其祈珥故書祈爲幾杜子  
春讀幾當爲祈鄭氏謂祈當爲進禋之禋夏官小子祈  
于五祀注祈或爲釁用毛牲曰釁說文蠶以血有所釁  
涂祭也从血幾聲蠶幾禋釁祈音義俱通釋天祭川曰  
浮沈郭曰投祭水中或浮或沈鄭氏太宗伯注祭山林  
曰埋川澤曰沈小子凡沈辜侯禴飾其牲鄭司農曰沈  
謂祭川尙書大傳沈四海注沈祭也祭水曰沈

桑土桑根也

詩鴉鵂  
釋文引

案毛傳桑土桑根也韓詩土作杜方言杜根也齊東曰  
杜摩雅杜根也

通五色皆曰繪

一切經音  
義六引

案禮記禮運瘞綰注幣帛曰綰漢書灌嬰傳睢陽贈綰者也注綰者帛之總名

綰帛也綰之精白者曰綰

後漢書順帝紀注引

案廣詁綰帛同訓白故綰爲帛綰之精者曰綰見廣服漢書食貨志曳綰注綰帛素也綰之精白者也

枅謂之枅械謂之枅

易蒙卦釋文引

案說文云枅手械也枅足械也鄭氏周禮掌囚注亦謂在手曰枅在足曰枅釋文引張揖云參著曰枅偏著曰枅禮記月令釋文枅今之械也枅今之枅也枅通作枅廣雅并謂之枅械謂之枅

所以飼獸曰芻

一切經音義一引又上七引所以飼獸曰芻

案芻芻古今字禮記月令按芻黍注養牛羊曰芻左昭十三年傳淫芻蕘者釋文飼牲曰芻漢書楊雄傳麋鹿

芻蕘注芻所以飼牛馬

大而白脰者謂之蒼烏

水經注澤水注引

案廣鳥白頂而羣飛者謂之燕烏蒼烏蓋卽燕烏之類  
宋書符瑞志蒼烏者賢君修仁孝慈丁萬姓不好殺生  
則來

豕之大者謂之豮豕

爾雅釋文引

案廣獸佚豕字爾雅釋獸其跡刻絕有力豕又釋畜彘  
五尺爲豕郭注引尸子曰大豕爲豕五尺今漁陽呼猪  
大者爲豕

兔之所息謂之窟鹿之所息謂之場

埤雅引

案國策狡兔有三窟埤雅曰兔營窟必背邱相通詩東  
山篇町疇鹿場

雞雉所乳之窠在樹曰巢在穴曰窟也

義一引

案說文鳥在木上曰巢在穴曰窠又窟物在穴中兒

附錄

史記楚世家楚武公曰居三代之傳器吞三翻六翼以高  
世主索隱云翻亦作𪔐同音厯三翻六翼亦謂九鼎空足  
曰翻六翼卽六耳翼近耳旁事具小爾雅

史記范雎蔡澤傳或欲大投或於分功索隱云言夫博弈  
或欲大投其瓊以致勝或觀其勢弱則投地而分功以遠  
救也事具小爾雅

史記馮唐傳百金之士十萬注服虔曰良士直百金也或  
曰直百金言重索隱曰晉灼云百金喻其貴重也注云或  
者服晉之說也劉氏曰其功可賞百金者事見管子及小  
爾雅

小爾雅疏證卷五終